

舊五代史

三



舊五代史卷十一

宋司空同中書門下平章事薛居正等撰

后妃列傳第一

案梁后妃傳永樂大典闕全篇其散見者僅得四條今采北夢瑣言五代會要

諸書分注于下以存當日之事蹟

梁書十一

文惠皇太后王氏開平初追諡

永樂大典卷一萬三千三百五十二

太祖

性孝愿奉太后未嘗小失色朝夕視膳爲士君子之規

範帝嚴察用法無纖毫假貸太后言之帝頗爲省刑

永樂

大典卷一萬七千一百七十

案北夢瑣言云梁祖父

誠早卒有三子俱幼母王氏攜養寄于同縣人劉崇家昆弟之中惟溫狡猾無行崇母撫養之崇兄弟嘗加譴杖一日偷崇家金而竄爲崇追同崇母遮護以免扑責善逐走鹿往往及而獲之又崇母嘗見其有龍蛇之異他日與仲兄存入黃巢軍作賊伯兄昱與母王氏尚依

劉家溫既辭去不知存亡及溫領鎮于汴盛飾輿馬使人迎母于崇家王氏惶恐辭避深藏不之信謂人曰朱三落拓無行何處作賊送死焉能自致富貴汴帥非吾子也使者的具陳離鄉去里之由歸國立功之事王氏方泣而信是日與崇母並迎歸汴盛禮郊迎人士改觀崇以舊恩位至列卿爲商州刺史王氏以溫貴封晉國太夫人仲兄存于賊中爲矢石所中而卒溫置酒于母歡甚語及家事謂母曰朱五經辛苦業儒不登一命今有子爲節度使無忝前人矣母不懌良久謂溫曰汝致身及此信爲英特行義未必如先人朱二與汝同入賊軍身死蠻徼孤男稚女艱食無告汝未有恤孤之心英特卽有諸無取也溫垂涕謝罪卽令召諸兄子皆至汴友寧友倫皆立軍功位至方鎮

元貞皇后張氏乾化中追諡

永樂大典卷一萬三千三百五十二

案五代會要

太祖皇后張氏早崩開平二年追封賢如至乾化二年十一月二十三日追冊曰元貞皇后又北夢瑣言云梁祖魏國夫人張氏碭山富室女父蕤曾爲宋州刺史溫時聞張有姿色私心傾慕有麗華之嘆及溫在同州得

張于兵間因以婦禮納之溫以其宿款深加禮異張賢
明有禮溫雖虎狼其心亦所景伏每軍謀國計必先延
訪或已出師中途有所不可張氏一介請旋如期而至
其信重如此初收兗鄆得朱瑾妻溫告之曰彼既無依
寓于輜車張氏遣人召之瑾妻再拜張氏答拜泣下謂
之曰兗鄆與司空同姓之國昆仲之間以小故尋戈致
吾妣如此設不幸汴州失守妾亦似吾妣之今日也又
泣下乃度爲尼張恆給其費張旣卒繼娶者非人及僭
號後大縱朋淫骨肉聚麀帷薄荒穢以致友珪之禍起
于婦人始能以柔婉之德制豺虎之心如張氏者不亦
賢乎又案五代會要所載內職有梁太祖
昭儀陳氏昭容李氏歐陽史並見家人傳

末帝德妃張氏

永樂大典卷一千二百六十六案五
代會要少帝妃張氏乾化五年九月二

十四日冊爲德妃其夕薨

又案歐陽史次妃郭氏傳

云晉天福三年詔大社先藏罪人首級許親屬收葬乃
出末帝首遣右衛將軍安崇阮與妃同葬之妃卒洛陽
龐元英文昌雜錄云梁均王晉天福中始葬故妃張氏
獨存考功員外商鵬爲誌文曰七月有期不見望陵之
妾九疑無色空餘泣竹之妃今案末帝德妃張氏早薨

後與末帝同葬而次妃郭氏天福中尚存歐陽史不明
言同葬者爲何妃文昌雜錄誤以尚存者爲故妃張氏
蓋傳聞之失實也今薛史梁后妃傳雖缺參考末帝紀
及晉高祖紀定爲德妃張氏同葬云又案五代史無
外戚傳五代會要云梁太祖長女安陽公主降羅延規
開平二年八月追封長樂公主降趙巖開平元年五月
十一日封普寧公主降昭祚王氏開平元年五月十一
日封金華公主開平二年十月封眞寧公主乾化三年
十月五日封少帝長女壽春公主乾化三年四月五日
封第二女壽昌公主貞明元年九月二十三日封今考
通鑑考異引梁功臣列傳云羅延規尚安陽公主又尚
金華公主薛史羅紹威傳亦載開平四年詔金華公主
出家爲尼是金華公主實歸羅氏而五代會要不載亦闕文也

舊五代史卷十一終

舊五代史卷十一攷證

梁列傳一后妃傳末帝德妃張氏 案龐元英文昌雜錄梁均王晉天福中始葬故妃張氏獨存考功員外商鵬爲誌文曰七月有期不見望陵之妾九疑無色空餘泣竹之妃今攷五代會要德妃張氏早薨歐陽史次妃郭氏莊宗入宮度爲尼是晉天福中尙存者郭妃非德妃與末帝同葬者德妃非郭妃也歐陽史不明言同葬者爲何妃文昌雜錄誤以尙存者爲故妃張氏蓋傳聞之失實也

舊五代史卷十一攷證

舊五代史卷十二

宋司空同中書門下平章事薛居正等撰

宗室列傳第二

案梁宗室傳永樂大典唯友寧友倫友

者十五條通鑑注引一條其見冊府元龜者又得六條謹考其事蹟前後如次如左

梁書十二

廣王全昱太祖長兄受禪後封

永樂大典卷一萬六千六百二十八

乾化

元年還睢陽命內臣拜餞都外王出宿至于偃師仍詔

其子衡王友諒侍從以歸

冊府元龜卷二百七十七

庶人篡位授宋

州節度使

冊府元龜卷二百七十七

貞明二年卒

永樂大典卷一萬六千六百二十八

案五代會要全昱贈尚書令諡德靖

五代史闕文

全昱梁祖之兄也既受禪宮中開宴惟親王得與因爲博戲全昱酒酣忽起取骰子擊盆迸散大呼梁祖曰朱三汝碭山一民因天下饑荒入黃巢作賊天子用汝爲

四鎮節度使富貴足矣何故滅他李家三百年社稷稱
王稱朕吾不忍見血吾族矣安用博爲梁祖不悅而罷
臣謹按梁史廣王全昱傳曰昱樸野常呼帝爲三宮中
博戲之事諱之夫梁祖弑二君弑一皇后名臣被害者
不可勝紀及莊宗卽位盡誅朱氏惟全昱先令終至道
初知單州有稱廣王之後與尼訟田者豈以一言之善
獨存其嗣耶

友諒全昱子初封衡王後嗣廣王

永樂大典卷一萬繼

歷藩郡多行不法

冊府元龜卷二百九十九

坐弟友能反廢囚京師

唐師入汴與友能友誨同日遇害

永樂大典卷一萬繼

友能全昱子封惠王後爲宋滑二州留後

永樂大典卷一萬六千六

百二十八

案友能後以叛廢詳見末帝紀又通鑑云

龍紀元年夏四月陳州刺史惠王友能反舉兵趨大梁

詔陝州留後霍彥威宣義節度使王彥章控鶴指揮使

張漢傑將兵討之友能至陳留兵敗走還陳州諸軍圍

之秋七月惠王友能降庚子詔赦其死降封房陵侯

友誨全昱子封邵王

永樂大典卷一萬六千六百二十八

乾化元年以檢

校兵部尙書充控鶴指揮使

冊府元龜卷二百六十九

坐友能反廢

後爲唐兵所殺

永樂大典卷一萬六千六百二十六案通鑑云邵王友誨全昱之子也性穎

悟人心多向之或言其誘致禁軍欲爲亂梁主召友誨與其兄友諒友能並幽于別第及唐師將至梁主疑諸兄弟乘危謀亂並皇弟賀王友雍建王友徽盡殺之考異曰薛史云友諒友能友誨莊宗入汴同日遇害按中都既敗均王親弟猶疑而殺之况其從弟嘗爲亂者豈得獨存云云考通鑑以友諒等爲末帝自殺考異祇以事理度之而不言所據何書歐陽史仍從薛史王禹偁五代史闕文亦云莊宗卽位盡誅朱氏度當日事勢梁末帝自中都告敗救死不遑未必盡誅兄弟當以薛史爲得其實通鑑所載恐未足據也

安王友寧字安仁少習詩禮長喜兵法有倜儻之風太

祖鎮汴累署軍職每因出師多命統驍果以從及擒秦宗權太祖令友寧輜送宗權西獻于長安詔加檢校右散騎常侍行右監門衛將軍自是繼立軍功累官至檢校司空兼龔柳二州刺史太祖駐軍岐下遣友寧領所部兵先歸梁苑以備守禦屬青帥王師範搆亂以關東諸兵悉在岐隴欲乘虛竊發自齊魯至于華下羅布姦黨皆詐以委輸貢奉爲名陰與淮夷并門結好會有青人詣裴廸言其狀廸以事告友寧不俟命乃率兵萬餘人東討師範遣其弟將兵圍齊州友寧引兵救之青寇大敗奪馬四千蹄斬首數千級及昭宗歸長安朝廷議

迎駕功友寧授嶺南西道節度使加特進檢校司徒賜
號迎鑾毅勇功臣時青寇數千越嶮潛伏欲入兗州友
寧知之伏兵于兗南邀之大破賊眾無得免者自是兗
壁危窘友寧督諸軍進逼營兵首攻博昌縣月餘未能
拔太祖怒遣劉捍督戰友寧乃下俘民眾十餘萬各領
負木石牽牛驢于城南爲土山旣至合人畜木石排而
築之冤枉之聲聞數十里俄而城陷盡屠其邑人清河
爲之不流及進迫寇壘與清人戰于石樓王師小却友
寧旁自峻阜馳騎以赴敵所乘馬蹶而仆遂没于陣友
寧將戰之前日有大白蛇蟠于帳中友寧心惡之旣而

果遇禍焉

永樂大典卷一萬八千一百二十六

密王友倫幼聰悟喜筆札曉聲律及長好騎射有經度之智太祖每奇之曰吾家千里駒也年十九爲宣武軍校景福初充元從騎軍都將尋表爲右武軍將軍漸委戎事太祖征兗鄆友倫勒所部兵收聚糧穀以濟軍須幽滄軍至內黃友倫前鋒夜渡河擊賊奪馬千匹擒斬甚衆因引兵往八議關卒逢晉軍萬餘騎友倫乃分布兵士多設疑軍因聲鼓誓衆士伍奮躍追斬數十里其後李罕之請以上黨來歸爲晉軍所圍太祖遣友倫總步騎數萬越險救應遂大破晉軍唐朝加檢校司空守

藤州刺史天復元年岐隴用兵晉人乘虛侵于北鄙友倫率徒兵三萬徑往磬山晉人望塵奔逸友倫與氏叔琮等躡其轍追至太原摩壘挑戰獲牛馬萬餘二年領所部兵西赴鳳翔前後累接戰三年昭宗歸長安制授友倫寧遠軍節度使檢校司徒賜號迎鑾毅勇功臣及太祖東歸留友倫宿衛京師歲餘因會賓擊鞠墜馬而卒昭宗輟視朝一日詔贈太傅歸葬于碭山縣開平初有司上言曰東漢受命伯升預其始謀西周尙親叔虞荷其封邑故皇兄存凋零霜露綿厯歲時恩莫逮于陟岡禮方弘于事日皇姪故邕州節度使友寧故容州節

度使使友倫頃因締構俱習韜鈴並以戰功歿于皇事

永言帶礪合議封崇

案五代會要開平二年正月追封從子友寧爲安王友倫爲密王四

皇四月追封皇兄存爲朗王是朗王之封實在安王密王之後據薛史有司上言又似一時並封未詳孰是又

會要載四年六月追封皇伯義方爲

于是存追封朗王

友寧追封安王友倫追封密王

永樂大典卷一萬八千一百二十六

柳王友裕字端夫太祖長子也幼善射御從太祖征伐

性寬厚頗得士心唐中和中太祖會并帥李克用攻圍

華州賊將黃鄴固守甚堅俄有一人登陴大詈克用令

蕃騎連射終不能中命友裕射之應弦而斃大軍喜噪

聲振山谷克用因以良弓百矢遺焉太祖鎮汴表爲宣

武軍牙校及蔡賊殄滅朝廷議功加檢校左僕射尋爲牙內馬步都指揮使景福元年總大軍伐徐時朱瑾領兗鄆之眾爲徐戎外援陣于彭門南石佛山下友裕縱

兵擊之斬獲甚眾瑾領殘黨宵遁

案通鑑朱友裕圍彭城時傳數出兵友裕

閉壁不戰朱瑾宵遁友裕不追據薛史則友裕擊破朱瑾師斬獲甚眾未嘗閉壁與通鑑異歐陽史從薛史

時都虞候朱友恭羽書聞于太祖誣友裕按兵不追賊

太祖大怒因驛騎傳符令裨將龐師古代友裕爲帥仍

令按劾其事會使人誤致書于友裕友裕懼遂以數騎

遁于山中

案通鑑作以二千騎逃入山中歐陽史從薛史作數騎

尋詣廣王于輝

州以訴其冤賴元貞皇后聞而召之令束身歸汴力爲

營救太祖乃捨之令權知許州乾寧二年加檢校司空
尋爲武寧軍節度留後四年太祖下東平改天平軍留
後加檢校司徒光啟元年再領許州天復初爲奉國軍
節度留後太祖兼鎮河中以友裕爲護國軍節度留後
尋遷華州節度使加檢校太保興德尹天佑元年七月
兼行營都統領步騎數萬經畧邠岐十月友裕有疾將
校乃謀旋師尋卒于梨園歸葬東京開平初追贈郴王
乾化三年又贈太師

永樂大典卷一萬
八千一百二十六

博王友文本姓康名勤太祖養以爲子受禪後封爲王

永樂大典卷一萬
六千六百二十六

爲東京留守嗜酒頗怠于爲政

冊府元龜

卷二百 友珪弒逆並殺友文末帝卽位盡復官爵

永樂大典

卷一萬六千六百二十八

友珪小字遙喜母失其姓本亳州營妓也唐光啟中帝

徇地亳州召而侍寢月餘將捨之而去以娠告是時元

貞張后賢而有寵帝素憚之由是不果攜歸大梁因留

亳州以別宅貯之及期伎以生男來告帝喜故字之曰

遙喜後迎歸汴

通鑑注引薛史

受禪後封郢王

永樂大典卷一萬六千六百二

十開平四年十月檢校司徒充左右控鶴都指揮使兼

管四蕃將軍乾化元年充諸軍都虞候

冊府元龜卷二百六十九

年弒太祖篡位均王以兵討之自殺追廢爲庶人

永樂大典

卷一萬六千六百二十八 案五代會要郢王友珪開
平元年五月九日封至乾化二年六月三日篡位僞改
鳳歷元年三月十七日京城軍亂侍衛袁象先率兵入
宮友珪自殺少帝卽位追削爲庶人又載周廣順中張
紹修實錄奏云梁末帝之上郢王友珪篡弑君位未
有紀錄請依宋書劉劭例書爲元凶友珪案梁實錄今
考無

福王友璋太祖第五子受禪後封

永樂大典卷一萬六千六百二十八

賀王友雍太祖第六子受禪後封

永樂大典卷一萬六千六百二十八

建王友徽太祖第七子受禪後封

永樂大典卷一萬六千六百二十八

康王友孜太祖第八子末帝卽位後封後以反誅

永樂大典

卷一萬六千六百二十八 案友孜通鑑
及五代會要俱作友敬歐陽史與薛史同

舊五代史卷十二終

舊五代史卷十二攷證

密王友倫傳因引兵往八議關 案八議原本訛作八
識今據通鑑改正

于是存追封朗王友寧追封安王友倫追封密王 案
五代會要開平二年追封皇從子友寧爲安王友倫
爲密王四年追封皇兄存爲朗王據是書作一時並
封未知孰是

郴王友裕傳遂以數騎遁於山中 案數騎通鑑作二
千騎歐陽史與是書同

康王友孜傳 案友孜通鑑及五代會要作友敬惟歐

陽史與是書同

舊五代史卷十二攷證

舊五代史卷十三

宋司空同中書門下平章事薛居正等撰

列傳第三

梁書十三

朱瑄宋州下邑人也父慶里之豪右以攻剽販鹽爲事吏捕之伏法瑄坐父罪以笞免因入王敬武軍爲小校

唐中和二年諫議大夫張濬徵兵于青州敬武遣將曹

全晟

案新唐書及通鑑俱作曹存實舊唐書歐陽史與薛史同

率軍赴之以瑄隸焉

以戰功累遷列校賊敗出關全晟以本軍還鎮會鄆帥

薛崇卒部將崔君預

案舊唐書作崔君裕

據城叛全晟攻之殺君

預自爲留後瑄以功授濮州刺史鄆州馬步軍都將光

啟初魏博韓允中攻鄆

案新唐書作中和初魏博韓簡

韓允忠傳乾符元年十一月卒子簡起復為節度觀察

留後新唐書本紀亦云韓允中卒其子簡自稱留後是

東窺曹鄆實韓簡非允中也薛史似微誤全最為其所

通鑑作中和二年韓簡擊鄆州當得其實

害案舊唐書韓簡傳云移軍攻鄆鄆帥曹全最出戰為

其城半年不下朱瑄傳云崔裕收合殘眾保鄆州簡進攻

兵寡襲君裕據韓簡傳全最死而君裕權知州事全最知其

傳則君裕為全最所殺二傳自相矛盾新唐書本紀作

韓簡寇鄆州天平軍曹全最死之部將崔用自稱留後

與舊書韓簡傳同惟崔用之名有異耳瑄據城自若三

薛史定從舊書朱瑄傳通鑑與薛史同

軍推為留後允中敗案舊唐書韓簡傳云簡以憂憤疽

諸葛爽傳云中和元年十一月卒時中和元年十一月也

正月簡為牙將所殺新唐書本紀云中和三年二月魏

博軍亂殺其節度使韓簡通鑑與新唐書同薛史誤作

允中歷考諸書年月參差姓名外異無可依據蓋唐末

典章散佚故傳聞失實如此

朝廷以瑄爲天平軍節度使累加官至

檢校太尉同平章事太祖初鎮大梁兵威未振連歲爲秦宗權所圍士不解甲危殆日數四太祖以瑄同宗早兄事之乃遣使求援于瑄光啟末宗權急攻大梁瑄與弟瑾率兗鄆之師來援大敗蔡賊解圍而遁太祖感其力厚禮以歸之先是瑄瑾駐于大梁覩太祖軍士驍勇私心愛之及歸厚懸金帛于界上以誘焉諸軍貪其厚利私遁者甚衆太祖移牒以讓之瑄來詞不遜由是始構隙焉及秦宗權敗太祖移軍攻時溥于徐州時瑄方右溥乃遣使來告太祖曰巢權繼爲蛇虺毒螫中原與

君把臂同盟輔車相依今賊已平殄人粗聊生吾弟宜
念遠圖不可自相魚肉或行人之失辭疆吏之踰法可
以理遣未得便睽和好投鼠忌器弟幸思之太祖方怒
時溥通于孫儒不從其言及龐師古攻徐州瑄出師來
援太祖深銜之徐旣平太祖併兵以攻鄆自景福元年
冬遣朱友裕領軍渡濟至乾寧三年宿軍齊鄆間大小
凡數十戰語在太祖紀中自是野無人耕屬城悉爲我
有瑄乃遣人求于太原李克用遣其將李承嗣史儼等
援之尋爲羅弘信所扼援路旣絕瑄瑾竟敗乾寧四年
正月龐師古攻陷鄆州遁至中都北匿于民家爲其所

筆并妻榮氏擒之來獻俱斬于汴橋下

永樂大典卷二千三百三十三案

舊唐書云瑄與妻榮氏出奔至中都爲野人所害傳首汴州榮氏至汴州爲尼與薛史異

朱瑾瑄從父弟雄武絕倫性頗殘忍光啟中瑾與兗州節度使齊克讓婚瑾自鄆盛飾車服私藏兵甲以赴禮會親迎之夜甲士竊發擄克讓自稱留後及蔡賊鴟張瑾與太祖連衡同討宗權前後屢捷以功正授兗州節度使旣得士心有兼并天下之意太祖亦忌之瑾以厚利招誘太祖軍士以爲間諜及太祖攻鄆瑾出師來援累與太祖接戰乾寧二年春太祖令大將朱友恭攻瑾掘塹柵以環之朱瑄遣將賀瓌及蕃將何懷寶赴援爲

友恭所擒十一月瑾從兄齊州刺史瓊以州降太祖令
執賀瓌懷寶及瓊以徇于城下語曰卿兄已敗早宜効
順瑾僞遣牙將瑚兒持書幣送降太祖自至延壽門外
與瑾交語瑾謂太祖曰欲令大將送符印願得兄瓊來
押領所貴骨肉盡布腹心也太祖遣瓊與客將劉捍取
符箚瑾單馬立于橋上揮手謂捍曰可令兄來余有密
款卽令瓊往瑾先令騎士董懷進伏于橋下及瓊至懷
進突出擒瓊而入俄而斬瓊首投于城外太祖乃班師
及鄆州陷龐師古乘勝攻克瑾與李承嗣方出兵求芻
粟于豐沛間瑾之二子

案新唐書
作子用貞

及大將康懷英判官

辛綰小校閭寶以城降師古瑾無歸卽與承嗣將麾下

士將保沂州刺史尹處賓

案新唐書作尹懷賓

拒關不納乃保海

州爲師古所逼遂擁州民渡淮依楊行密

案新唐書刺史朱用芝以

其眾與瑾奔楊行密

行密表瑾領徐州節度使龐師古渡淮行密

令瑾率師以禦之清口之敗瑾有力焉自是瑾率淮軍

連歲北寇徐宿大爲東南之患及行密卒子渭繼立以

徐溫子知訓爲行軍副使寵遇頗深後楊溥僭號知訓

爲樞密使知政事以瑾爲同平章事仍督親軍時徐溫

父子恃寵專政慮瑾不附已

陳彭年江南別錄云徐知訓初學兵法于朱瑾瑾悉

心教之後與瑾有隙夜遣壯士殺瑾瑾手刃數人埋于舍後

貞明四年六月出瑾爲

淮寧軍節度使知訓設家宴以餞瑾瑾事之愈遜翌日
詣知訓第謝留門久之知訓家僮私謂瑾曰政事相公
此夕在白牡丹妓院侍者無得往瑾謂典謁曰吾不奈
朝飢且歸旣而知訓聞之愕然曰晚當過瑾瑾厚備供
帳瑾有所乘名馬冬以錦帳貯之夏以羅幃護之愛妓
桃氏案九國志作妻陶氏有絕色善歌舞及知訓至奉卮酒爲壽
初以名馬奉知訓喜而言曰相公出鎮與吾暫別離恨
可知願此盡歡瑾卽延知訓于中堂出桃氏酒旣醉瑾
斬知訓首示其部下馬令南唐書云知訓因求馬于瑾瑾不與遂有隙俄出瑾爲靜淮節
度使瑾詣知訓別且願獻前馬知訓喜往謁瑾因以其
家瑾妻出拜知訓答拜瑾以笏擊踣遂斬知訓

眾急趨衙城知訓之黨已闔門矣唯瑾得獨入與衙兵

戰

案九國志崔虔傳云虔驅率散卒共閉關瑾以是不得出

復踰城而出傷足求馬

不獲遂自刎

案九國志米志誠傳志誠被甲親從十餘騎至天興門問瑾所向聞瑾已死乃歸

暴其屍于市盛夏無蠅蛆徐溫令投之于江部人竊收

葬之溫疾亟夢瑾被髮引滿將射之溫乃爲之禮葬立

祠以祭之

永樂大典卷二千三十一

五代史補瑾之

諸將數等瑾感行密見知欲立奇功爲報但恨無入陣

馬忽忽不樂一日晝寢夢老叟眉髮皓然謂瑾曰君長

恨無入陣馬今馬生矣及廐隸報適退槽馬生一駒見

卧未能起瑾驚曰何應之速也行往視之見骨目皆非

常馬大喜曰事辦矣其後破杜洪取鍾傳未嘗不得力

焉初瑾之來也徐溫觀其英烈深忌之故瑾不敢預政

及行密死子溥嗣位溫與張鎰爭權襲殺鎰自是事無

大小皆決于溫既而溫復爲自安之計乃以子知訓自

代然後引兵出居金陵實欲控制中外知訓尤恣橫瑾
居常嫉之一旦知訓欲得瑾所乘馬瑾怒遂擊殺知訓
提其首請溥起兵誅溫溥素怯懦見之掩面而走瑾曰
老婢兒不足爲計亦自殺中外大駭且懼溫至遽以瑾
屍暴之市中時盛暑肌肉累日不壞至青蠅無敢輒
泊人有病者或於暴屍處取土煎而服之無不愈

時溥徐州人初爲州之驍將唐中和初秦宗權據蔡州

侵寇鄰藩節度使支詳命溥率師以討之徐軍屢捷軍

情歸順以節鉞授之

冊府元龜卷四百一十二 案薛史時溥傳永樂大典原闕今考冊

府元龜引梁時溥一條當係薛史原文謹爲補入又考舊唐書列傳云時溥彭城人徐之牙將黃巢據長安詔徵天下兵進討中和二年武寧軍節度使支詳遣溥與副將陳璠帥師五千赴難行至河陰軍亂剽河陰縣廻溥招合撫諭其眾復集懼罪屯于境上詳遣人迎犒悉恕之溥乃移軍向徐州旣入軍人大呼推溥爲留後送詳於大彭館溥大出資裝遣陳璠援詳歸京詳宿七里亭其夜爲璠所殺舉家屠害溥以璠爲宿州刺史竟以

違命殺詳溥誅璠又令別將帥軍三千赴難京師天子
還宮授之節鉞及黃巢攻陳州秦宗權據蔡州與賊連
結徐蔡相近溥出師討之軍鋒益盛每戰屢捷黃巢之
敗也其將尚讓以數千人降溥後林言又斬黃巢首歸
徐州時溥功居第一詔授檢校太尉中書令鉅鹿郡王
宗權未平仍授溥徐州行營兵馬都統蔡賊平朱全忠
與之爭功遂相嫌怨淮南亂朝廷以全忠遙領淮南節
度以平孫儒行密之亂汴人應援路出徐方溥阻之全
忠怒出師攻徐自光啟至大順六七年間汴軍四集徐
泗三郡民無耕稼頻歲水災人喪十六七溥窘蹙求和
于汴全忠曰移鎮則可朝廷以尚書劉崇望代溥以溥
爲太子太師溥恐出城見殺不受代汴將龐師古陳兵
于野溥求援于兗州朱瑾出兵救之值大雪糧盡而還
城中守陴者飢甚加之疾疫汴將王重師牛存節夜乘
梯而入溥與妻子登樓自焚而
卒實景福二年也地入于汴

王師範青州人父敬武初爲平盧牙將唐廣明元年無
棣人洪霸郎合群盜于齊棣間節度使安師儒遣敬武

討平之及巢賊犯長安諸藩擅易主帥敬武乃逐師儒
自爲留後王鐸承制授以節鉞後以出師勤王功加太
尉平章事龍紀中敬武卒師範年幼三軍推之爲帥棣
州刺史張蟾叛于師範不受節度朝廷乃以崔安潛爲
平盧帥師範拒命張蟾迎安潛至郡同討師範師範遣
將盧洪將兵攻蟾弘復叛與蟾通謀僞旋軍將襲青州
師範知之遣重賂迎謂之曰吾以先人之故爲軍府所
推年方幼少未能幹事如公以先人之故令不乏祀公
之仁也如以爲難與成事乞保首領以守先人墳墓亦
惟命弘以師範年幼必無能爲不爲之備師範伏兵要

路迎而享之預謂紀綱劉鄩曰翌日盧弘至爾卽斬之
酬爾以軍校鄩如其言斬弘于座上及同亂者數人因
戒厲士眾大行頒賞與之誓約自率之以攻棣州擒張
蟾斬之安潛遁還長安師範雅好儒術少負縱橫之學
故安民禁暴各有方略當時藩翰咸稱之及太祖平兗
鄆遣朱友恭攻之師範乞盟遂與通好天復元年冬李
茂貞刦遷車駕幸鳳翔韓全誨矯詔加罪于太祖令方
鎮出師赴難詔至青州師範承詔泣下曰吾輩爲天子
藩籬君父有難略無奮力者皆強兵自衛縱賊如此使
上失守宗祧危而不持是誰之過吾今日成敗以之乃

發使通楊行密

案新唐書全忠圍鳳翔昭宗詔方鎮赴難以師範附全忠命楊行密部將朱瑾

攻青州且欲代爲平盧軍節度使師範聞之哭曰吾爲國守藩君危不持可乎乃與行密連盟是師範之通行密乃因其將謀見代而始遣使也歐陽史因作遣將劉因乞兵于楊行密殊失事實而薛史亦未詳載

鄆襲兗州別將襲齊時太祖方圍鳳翔師範遣將張居厚部輿夫二百言有獻于太祖至華州城東華將婁敬思疑其有異剖輿視之乃兵仗也居厚等因呼殺敬思聚眾攻西城時崔胤在華州遣部下閉關拒之遂遁去是日劉鄆下兗州河南數十郡同日發太祖怒遣朱友寧率軍討之旣而友寧爲青軍所敗臨陣被擒傳首于淮南天復三年七月太祖復令楊師厚進攻屯于臨朐

師厚累敗青軍遂進寨于城下師範懼乃令副使李嗣

業詣師厚乞降

案師範之降薛史與新唐書異薛史則以爲兵臨城下而始降也新唐書云師

厚圍青州敗師範兵于臨朐執諸將又獲其弟師克是時師範衆尙十餘萬諸將請決戰而師範以弟故乃請降歐陽史云弟師魯大敗遂傳其城而梁別將劉重霸下其棧州師範乃請降亦微有不同

太祖許

之歲餘遣李振權典青州事因令師範舉家徙汴師範將至縞素乘驢請罪于太祖太祖以禮待之尋表爲河陽節度使會韓建移鎮青州太祖帳餞于郊師範預焉太祖謂建曰公頃在華陰政事之暇省覽經籍此亦士君子之大務今之青土政簡務暇可復修華陰之故事建搆謙而已太祖又曰公讀書必須精意勿錯用心太

祖以師範好儒前以青州叛故以此言譏之及太祖卽位徵爲金吾上將軍開平初太祖封諸子爲王友寧妻號訴于太祖曰陛下化家爲國人人皆得崇封妾夫早預艱難粗立勞効不幸師範反叛亡夫橫屍疆場冤讐尙在朝廷受陛下恩澤亡夫何罪太祖淒然泣下曰幾忘此賊卽遣人族師範于洛陽先掘坑于第側乃告之其弟師誨兄師悅及兒姪二百口咸盡戮焉時使者宣詔訖師範盛啟宴席令昆仲子弟列座謂使者曰死者人所不能免況有罪乎然予懼坑屍于下少長失序恐有愧于先人行酒之次令少長依次于坑所受戮人士

痛之後唐同光三年三月詔贈太尉

永樂大典卷一萬八千一百二十七

劉知俊字希賢徐州沛縣人也姿貌雄傑倜儻有大志始事徐帥時溥爲列校溥甚器之後以勇略見忌唐大順二年冬率所部二千人來降卽署爲軍校知俊被甲上馬輪劍入敵勇冠諸將太祖命左右義勝兩軍隸之尋用爲左開導指揮使故當時謂之劉開導從討秦宗權及攻徐州皆有功尋補徐州馬步軍都指揮使攻海州下之遂奏授刺史天復初歷典懷鄭二州從平青州以功奏授同州節度使天祐三年冬以兵五千破岐軍六萬于美原自是連克鄜延等五州乃加檢校太傅平

章事開平二年春三月命爲潞州行營招討使知俊未
至潞夾寨已陷晉人引軍方攻澤州聞知俊至乃退尋
改西路招討使六月大破岐軍于幕谷俘斬千計李茂
貞僅以身免三年五月加檢校太尉兼侍中封大彭郡
王時知俊威望益隆太祖雄猜日甚會佑國軍節度使
王重師無罪見誅知俊居不自安乃據同州叛鑒戒錄云彭城
王劉知俊鎮同州日因築營牆掘得一物重八十餘斤
狀若油囊召賓幕將校問之劉源曰此是冤氣所結古
來固圉之地或有焉昔王充據洛陽修河南府獄亦獲
此物源聞酒能忘憂莫以醇醪或可消釋耳然此物之
出亦非吉徵也知俊命具酒饌祝送款于李茂貞又
酹復瘞之尋有叛城背主之事

分兵以襲雍華雍州節度使劉捍被擒送鳳翔害之華

州蔡敬思被傷獲免太祖聞知俊叛遣近臣諭之曰朕待卿甚厚何相負也知俊報曰臣非背德但畏死耳王重師不負陛下而致族滅太祖復遣使謂知俊曰朕不料卿爲此昨重師得罪蓋劉捍言陰結邠鳳終不爲國家用我今雖知枉濫悔不可追致卿如此我心恨恨蓋劉捍悞予事也捍一死固未塞責知俊不報遂分兵以守潼關太祖命劉鄩率兵進討攻潼關下之時知俊弟知浣爲新衛指揮使聞知俊叛自洛奔至潼關爲鄩所擒害之尋而王師繼至知俊乃舉族奔于鳳翔李茂貞厚待之僞加檢校太尉兼中書令以土疆不廣無藩鎮

以處之但厚給俸祿而已尋命率兵攻圍靈武且圖牧
圍之地靈武節度使韓遜遣使來告急太祖令康懷英
率師救之師次邠州長城嶺爲知俊邀擊懷英敗歸茂
貞悅署爲涇州節度使復命率眾攻興元進圍西縣會
蜀軍救至乃退九國志王宗鑑傳云岐將劉知俊等領
大軍分路來攻由階成路奪固鎮糧王
宗侃唐襲等禦之至青泥嶺爲知俊所敗退保西縣會
大雨漢江漲宗鑑自羅村得鄉導緣山而行數百里與
宗播遇于鐵谷合軍出湯頭時知俊自斜谷山南直抵
興州圍西縣軍人散掠巴中宗鑑與宗播襲之會王建
亦至遂解既而爲茂貞左右石簡頤等間之免其軍政
西縣之圍寓于岐下掩關歷年茂貞猶子繼崇鎮秦州因來寧觀
言知俊途窮至此不宜以讒嫉見疑茂貞乃誅簡頤等

以安其心繼崇又請令知俊挈家居秦州以就豐給茂
貞從之未幾邠州亂茂貞命知俊討之時邠州都校李
保衡納款于朝廷末帝遣霍彥威率眾先入于邠知俊
遂圍其城半載不能下會李繼崇以秦州降于蜀知俊
妻孥皆遷于成都遂解邠州之圍而歸岐陽以舉家入
蜀終慮猜忌因與親信百餘人夜斬關奔蜀王建待之
甚至卽授僞武信軍節度使尋命將兵伐岐不克班師
因圍隴州獲其帥桑弘志以歸久之復命爲都統再領
軍伐岐時都將皆王建舊人多違節度不成功而還蜀
人因而毀之先是王建雖加寵待然亦忌之嘗謂近侍

曰吾漸衰耗恆思身後劉知俊非爾輩能駕馭不如早爲之所又嫉其名者于里巷間作謠言云黑牛出圈樓繩斷知俊色黔而丑生機繩者王氏子孫皆以宗承爲名故以此構之僞蜀天漢元年冬十二月建遣人捕知俊斬于成都府之炭市及王衍嗣僞位以其子嗣禪尙僞峨眉長公主拜駙馬都尉後唐同光末隨例遷于洛卒知俊族子嗣彬幼從知俊征行累遷爲軍校及知俊叛以不預其謀得不坐貞明末大軍與晉王對壘于德勝久之嗣彬率數騎奔于晉具言朝廷軍機得失又以家世讎怨將以報之晉王深信之卽厚給田宅仍賜錦

衣玉帶軍中目爲劉二哥居一年復來奔當時晉人謂是刺客以晉王恩澤之厚故不竊發龍德三年冬從王彥章戰于中都軍敗爲晉人所擒晉王見之笑謂嗣彬曰爾可還予玉帶嗣彬惶恐請死遂誅之

永樂大典卷九千九十八

楊崇本不知何許人幼爲李茂貞之假子因冒姓李氏

名繼徽唐光化中茂貞表爲邠州節度使天復元年冬

太祖自鳳翔移軍北伐駐旆于邠郊命諸軍攻其城崇

本懼出城請降太祖復置爲邠州節度使仍令復其本

姓名焉及師還遷其族于河中

案舊唐書十一月乙亥邠州節度使李繼徽以

城降全忠乃舍其孥于河中以繼徽其後太祖因統戎從軍新唐書作辛未與舊唐書異

往來由于蒲津以崇本妻素有姿色嬖之于別館其婦
素剛烈私懷愧恥遣侍者讓崇本曰丈夫擁旄仗鉞不
能庇其伉儷我已爲朱公婦今生無面目對卿期于刀
繩而已崇本聞之但洒淚含怒及昭宗自鳳翔回京崇
本之家得歸邠州崇本恥其妻見辱因茲復貳于太祖
乃遣使告茂貞曰朱氏兆亂謀危唐祚父爲國家磐石
不可坐觀其禍宜于此時畢命興復事苟不濟死爲社
稷可也茂貞乃遣使會兵于太原時西川王建亦令大
將出師以助之岐蜀連兵以攻雍華關西大震太祖遣
郴王友裕帥師禦之會友裕卒于行乃班師天佑三年

冬十月崇本復領鳳翔邠涇秦隴之師會延州胡章之

眾合五六萬屯于美原列柵十五兵勢甚盛太祖命同

州節度使劉知俊及康懷英帥師拒之崇本大敗復歸

于邠州自是垂翅久之乾化元年冬

案原本作乾化四年今從歐陽校正

爲其子彥魯所毒而死彥魯自稱留後復領其軍事凡

五十餘日爲崇本養子李保衡所殺保衡舉其城來降

末帝命霍彥威爲邠帥由是邠寧復爲末帝所有

永樂大典

卷一萬八千一百二十七

蔣殷不知何許人幼孤隨其母適于河中節度使王重
盈之家重盈憐之畜爲己子唐天復初太祖旣平蒲陝

殷與從兄珂舉族遷于大梁太祖感王重榮之舊恩凡王氏諸子皆錄用焉殷由是繼歷內職累遣至宣徽院使殷素與庶人友珪善友珪篡立命爲徐州節度使乾化四年秋末帝以福王友璋鎮徐方殷自以爲友珪之黨懼不受代遂堅壁以拒命時華州節度使王瓚殷之從弟也懼其連坐上章言殷本姓蔣非王氏之子也未帝乃下詔削奪殷在身官爵仍令却還本姓命牛存節劉鄩等帥軍討之是時殷求救于淮南楊溥遣朱瑾率衆來援存節等迎擊敗之貞明元年春存節劉鄩攻下徐州殷舉族自燔而死于火中得其屍梟首以獻之

永樂

大典卷一萬
八百三十一

張萬進雲州人初爲本州小校亡命投幽州劉守光厚
遇之任爲裨將滄州劉守文以弟守光囚父而竊據其
位自領兵問罪尋敗于雞蘇守光遂兼有滄景之地令
其子繼威主留務繼威年幼未能政事以萬進佐之凡
關軍政一皆委任繼威兇虐類父嘗淫亂于萬進之家
萬進怒而殺之又遣使歸于晉旣而末帝遣楊師厚劉
守奇潛兵掠鎮冀因東攻滄州萬進乞降通鑑云乾化二年九月庚
子萬進遣使奉表降于梁辛丑以萬進爲義昌留後甲
辰改義昌爲順化軍以萬進爲節度使此傳疑有關文
師厚表青州節度使俄遷兗州仍賜名守進萬進性旣

輕險專圖反側貞明四年冬據城叛命遣使送款于晉
王末帝降制削其官爵仍復其本名遣劉鄩討之晉人
不能救五年冬萬進危賊小將邢師遇潛謀內應開門
以納王師遂拔其城萬進族誅

永樂大典卷六
千三百五十

史臣曰夫雲雷構屯龍蛇起陸勢均者交鬪力敗者先
亡故瑄瑾時溥之流皆梁之吞噬斯亦理之常也唯瑾
始以竊發有土終以竊發亡身傳所謂君以此始必以
此終者乎師範屬衰季之運以興復爲謀事雖不成忠
則可尙雖貽族誅之禍亦可以與臧洪遊于地下矣知
俊驍武有餘奔亡不暇六合雖大無所容身夫如是則

豈若義以爲勇者乎崇本而下俱以叛滅又何足以道

哉

永樂大典卷六千三百五十

補遺

朱瑾傳

立祠以祭之

馬令南唐書云初宿衛將李球馬謙挾楊隆演登樓取庫兵以誅知

訓與戰頻却朱瑾適自外來以一騎前視其陣曰不足爲也因反顧一麾外兵爭進遂斬球謙亂兵皆潰瑾嘗有德於知訓者也

及其凶終人皆謂曲在知訓

劉知俊傳

懷英敗歸

九國志云李廷琦劉知俊自靈武班師塗經長城嶺梁帥率精英數萬躡

其後彥琦與知俊同設方略擊敗之

舊五代史卷十三終

舊五代史卷十三攷證

梁列傳三朱瑄傳敬武遣將曹全晟 案新唐書及通鑑俱作曹存實舊唐書歐陽史與是書同

部將崔君預據城叛全晟攻之 案舊唐書韓簡傳云曹全晟爲簡所敗死之鄆將崔君裕收合殘衆保鄆州朱瑄傳云崔君裕權知州事全晟知其兵寡襲君裕據韓簡傳則全晟死而君裕保其城據朱瑄傳則君裕爲全晟所殺二傳自相矛盾是書從朱瑄傳又君預諸史俱作君裕

光啟初魏博韓允中攻鄆 案新唐書作中和初魏博

韓簡東窺曹鄆攷舊唐書韓允中傳乾符元年十一月卒子簡起復爲節度觀察留後新唐書本紀亦云是攻鄆者韓簡非允中也通鑑作中和二年韓簡擊鄆州當得其實是書訛作允中與諸史年月人名舛異

朱瑾傳瑾從兄齊州刺史瓊以州降 齊州原本作濟州據通鑑及北夢瑣言改正

瑾之二子 案新唐書作瑾子用貞

刺史尹處賓 案新唐書作尹懷賓

出瑾爲淮寧軍節度使 淮寧原本作懷寧今據九國

志改正

愛妓桃氏 案九國志作妻陶氏

王師範傳棣州刺史張蟾叛于師範 張蟾原本作張

儋今據新唐書改正

劉知俊傳尋用爲左開道指揮使 開道原本作關道

今據歐陽史改正

楊崇本傳乾化元年 案原本作乾化四年今據歐陽

史改正

張萬進傳仍賜名守進 守進原本作方進今據本紀

改正

舊五代史卷十三攷證

舊五代史卷十四

宋司空同中書門下平章事薛居正等撰

列傳第四

梁書十四

羅紹威

案舊唐書紹威字端己

魏州貴鄉人父弘信本名宗弁初

爲馬牧監事節度使樂彥貞光啟末彥貞子從訓驕盈

太橫招聚兵甲欲誅牙軍牙軍怒聚謀攻之從訓出據

相州牙軍廢彥貞囚于龍興寺逼令爲僧尋殺之推小

校趙文建爲留後先是弘信自言于所居遇一白鬚翁

謂之曰爾當爲土地主如是者再心竊異之

羅弘信遇白鬚翁本

篝火狐鳴之故智唐書作鄰人相告新唐書作巫者傳言疑皆屬傳聞之誤薛史以爲弘信自言當得其實

既而文建不洽軍情牙軍聚呼曰孰願爲節度使者弘
信卽應曰白鬚翁早以命我可以君長爾曹唐文德元
年四月牙軍推弘信爲留後朝廷聞之卽正授節旄乾
寧中太祖急攻兗鄆朱瑄求援于太原時李克用遣大
將李存信率師赴之假道于魏屯于莘縣存信御軍無
法稍侵魏之芻牧弘信不平之太祖因遣使謂弘信曰
太原志吞河朔廻戈之日貴道堪憂弘信懼乃歸款于
太祖仍出師三萬攻李存信敗之案弘信攻李存信舊唐書與薛史同新唐書則云李存信侵魏芻牧弘信已不平旣而李瑋復壁莘弘信厭其暴及聞梁王遣使相告乃廻戈攻瑋也與薛史異未幾李克用領兵攻魏營于觀音門外屬邑多拔

太祖遣葛從周援之戰于洹水擒克用男落落以獻太祖令送于弘信斬之晉軍乃退是時太祖方圖克鄆慮弘信離貳每歲時賂遺必卑辭厚禮弘信每有答貺太祖必對魏使北面拜而受之曰六兄比予有倍年之長

兄弟之國安得以常鄰遇之故弘信以爲厚已其後弘

信累官至檢校太尉封臨清王

案舊唐書弘信先封豫章郡公進封北平王

光化元年八月薨于位紹威襲父位爲留後

案舊唐書紹威自文

德初授左散騎常侍充天雄軍節度副使自龍紀至乾寧十年之中累加官爵

朝廷因而命之

尋正授旄鉞累加檢校太尉兼侍中封長沙郡王昭宗東遷命諸道修洛邑紹威獨營太廟制加守侍中進封

鄴王初至德中田承嗣盜據相魏澶博衛貝等六州召募軍中子弟置之部下號曰牙軍皆豐給厚賜不勝驕寵年代寢遠父子相襲親黨膠固其凶戾者強賈豪奪踰法犯令長吏不能禁變易主帥有同兒戲自田氏已後垂二百年長帥廢置出于其手如史憲誠何全皞韓君雄樂彥貞皆爲其所立優獎小不如意則舉族被誅紹威懲其往弊雖以貨賂姑息而心銜之紹威嗣世之明年正月幽州劉仁恭擁兵十萬謀亂河朔進陷貝州長驅攻魏紹威求援于太祖太祖遣李思安援之屯于洹水葛從周自邢洛引軍入魏州燕將劉守文單可及

與王師戰于內黃大敗之乘勝追躡會從周亦出軍掩
擊又敗燕軍斬首三萬餘級三年紹威遣使會軍同攻
滄州以報之自是紹威感太祖援助之恩深加景附紹
威見唐祚衰凌羣雄交亂太祖兵強天下必知有禪代
之志故傾心附結贊成其事每慮牙軍變易心不自安
天祐初州城地無故自陷俄而小校李公佺謀變紹威
愈懼乃定計圖牙軍遣使告太祖求爲外援太祖許之
遣李思安會魏博軍再攻滄州先是安陽公主薨于魏
太祖因之遣長直軍校馬嗣勳選兵千人伏兵仗于巨
橐中肩舁以入魏州言助女葬事天祐三年正月五日

太祖親率大軍濟河聲言視行營于滄景牙軍頗疑其事是月十六日紹威率奴客數百與嗣勳同攻之時宿於牙城者千餘人遲明盡誅之凡八千家皆赤其族州城爲之一空翌日太祖自內黃馳至鄴時魏軍二萬方與王師同圍滄州聞城中有變乃擁大將史仁遇保于高唐六州之內皆爲勍敵太祖遣諸將分討之半歲方平自是紹威雖除其偏然尋有自弱之悔不數月復有浮陽之役紹威飛輓饋運自鄴至長蘆五百里疊跡重軌不絕于路又于魏州建元帥府署治道置亭候供牲牢酒糈軍幕什器上下數十萬人一無闕者及太祖廻

自長蘆復過魏州紹威乘間謂太祖曰邠岐太原終有
狂譎之志各以興復唐室爲詞王宜自取神器以絕人
望天與不取古人所非太祖深感之及登極加守太傅
兼中書令賜號扶天啟運竭節功臣車駕將入洛奉詔
重修五鳳樓朝元殿巨木良匠非當時所有倏架于地
泝流西立于舊址之上張設綈繡皆有副焉太祖甚喜
以寶帶名馬賜之先是河朔三鎮司管鑰備洒掃皆有
闔人紹威曰此類皆宮禁指使豈人臣家所宜畜也因
搜獲三十餘輩盡以來獻太祖嘉之開平中加守太師
兼中書令邑萬戶紹威嘗以臨淄海岱罷兵歲久儲庾

山積唯京師軍民多而食益寡願于太行伐木下安陽
淇門斲船三百艘置水運自大河入洛口歲漕百萬石
以給宿衛太祖深然之會紹威遘疾革遣使上章乞骸
骨太祖撫案動容顧使者曰亟行語而主爲我強飯如
有不可諱當世世貴爾子孫以相報也仍命其子周翰
監總軍府及訃至輟朝三日冊贈尙書令紹威在鎮凡
十七年年三十四薨永樂大典卷一萬八千一百二十六紹威形貌魁偉
有英傑氣工筆札曉音律性復精悍明敏服膺儒術明
達吏理好招延文士聚書萬卷開學館置書樓每歌酒
宴會與賓佐賦詩頗有情致太平廣記引羅紹威傳云當時藩牧之中最獲文章

之譽每命幕客作四方書檄小不稱意壞裂抵棄自江
壁牋起草下筆成文雖無藻麗之風幕客多所不及江
東人羅隱者佐錢鏐軍幕有詩名于天下紹威遣使賂
遺敘南巷之敬隱乃聚其所爲詩投寄之紹威酷嗜其
作因目己之所爲曰偷江東集至今鄴中人士諷詠之
紹威嘗有公讌詩云簾前淡泊雲頭日座上蕭騷雨脚
風雖深于詩者亦所歎伏紹威子三人長曰廷規位至
司農卿尙太祖女安陽公主又尙金華公主早卒次日
周翰繼爲魏博節度使亦早卒通鑑攷異引梁功臣傳云周翰起復雲麾將軍
充天雄軍節度留後尋檢校司徒正授魏博節度使季曰周敬厯滑州節度使別
有傳開平四年夏詔金華公主出家爲尼居于宋州元

靜寺蓋太祖推恩于羅氏令終其婦節也

永樂大典卷五千六百七

十八

五代史補羅鄴王紹威俊邁有詞學有好戲判

有常人向官街中鞦韆置鞍于地值車牛過急行碾破

其鞍驢主怒毆駕車者爲廂司所擒紹威更不按問遂

判其狀云鄴城大道甚寬何故駕車碾鞍領鞦韆漢子

科決待駕車漢子喜歡詞雖

俳諧理甚切當論者許之

趙犖其先天水人

案歐陽史作其先青州人

代爲忠武牙將曾祖賓

祖英奇父叔文皆歷故職犖幼有奇智齟齬之時與鄰

里小兒戲于道左恆分布行列爲部伍戰陣之狀自爲

董率指顧如夙習焉羣兒皆稟而從之無敢亂其行者

其父目而異之曰吾家千里駒也必大吾門矣及赴鄉

校誦讀之性出于同輩弱冠有壯節好功名妙于弓劍

氣義勇果郡守聞之擢爲牙校唐會昌中壺關作亂隨父北征收天井關未幾從王師征蠻浹月方克惟忠武將士轉戰溪洞之間斬獲甚衆本道錄其勳陟爲馬步都虞候乾符中王僊芝起于曹濮大縱其徒侵掠汝鄭犇乃率步騎數千襲之賊黨南奔及黃巢陷長安天子幸蜀中原無主人心騷動于是陳州數百人相率告許州連帥願得犇知軍州事其帥卽以狀聞于是天子下詔以犇守陳州刺史旣視事乃謂將吏曰賊巢之虐徧于四方苟不爲長安市人所誅則必驅殘黨以東下况與忠武久爲仇讎凌我土疆勢必然也乃遣增垣墉濬

溝恤實倉廩積薪芻凡四門之外兩舍之內民有資糧者悉令輓入郡中繕甲兵利劍稍弓弩矢石無不畢備又招召勁勇置之麾下以仲弟昶爲防遏都指揮使以季弟珣爲親從都知兵馬使長子麓次子霖皆分領銳兵黃巢在長安果爲王師四面扼束食盡人飢謀東奔之計先遣驍將孟楷擁徒萬人直入項縣犇引兵擊之賊衆大潰斬獲略盡生擒孟楷中和三年朝廷聞其功就加檢校兵部尙書俄轉右僕射不數月加司空進潁川縣伯巢黨知孟楷爲陳所擒大驚憤乃悉衆東來先據潞水後與蔡州秦宗權合勢以攻宛丘陳人懼焉犇

恐衆心攜離乃于衆中揚言曰忠武素稱義勇淮陽亦爲勁兵是宜戮力同心捍禦羣寇建功立節去危就安諸君宜圖之况吾家食陳祿久矣今賊衆圍逼衆寡不均男子當于死中求生又何懼也且死于爲國不猶愈于生而爲賊之伍耶汝當觀吾之破賊敢有異議者斬之由是衆心靡不踴躍無何開門與賊接戰每戰皆捷賊衆益怒巢于郡北三四里起八仙營如宮闕之狀又修百司廨署儲蓄山峙蔡人濟以甲冑軍無所闕焉凡圍陳三百日大小數百戰雖兵食將盡然人心益固隼因令間道奉羽書乞師于太祖太祖素多隼之勇果乃

許之四年四月太祖引大軍與諸軍會于陳之西北陳人望旗鼓出軍縱火急攻巢寨賊衆大潰重圍遂解獻捷于行在五年八月除犖爲蔡州節度使于時巢黨雖敗宗權益熾六七年間屠膾中原陷二十餘郡惟陳去蔡百餘里兵少力微日與爭鋒終不能屈文德元年蔡州平朝廷議勳以犖檢校司徒充泰寧軍節度使又改授浙西節度使不離宛丘兼領二鎮龍紀元年三月又以平巢蔡功就加平章事充忠武軍節度使仍以陳州爲理所由是中原塵靜唐帝復歸長安陳許流亡之民襁負歸業犖設法招撫又皆感之犖兄弟三人時稱雍

睦一日念仲弟昶同心王事共立軍功乃下令盡以軍州事付于昶遂上表乞骸後數月寢疾卒于陳州官舍年六十六葬于宛丘縣之先域累贈太尉準雖盡忠唐室保全陳州然默識太祖雄傑每降心託跡爲子孫之計故因解圍之後以愛子結親又請爲太祖立生祠于陳州朝夕拜謁數年之間悉力委輸凡所徵調無不率先故能保其功名長子麓位至列卿次子霖改名巖尙太祖女長樂公主開平初授衛尉卿駙馬都尉二年九月權知洺州軍州事俄轉天威軍使十二月授右羽林統軍改右衛上將軍充大內皇牆使三年七月出爲宿

州團練使旋移州刺史其後累歷近職連典禁軍預誅
庶人友珪有功末帝卽位用爲租庸使守戶部尙書巖
以勳戚貨賂公行天下之賄半入其門又以身尙公主
聞唐朝駙馬都尉杜琮位極將相以服御飲饌自奉務
極華侈巖恥其不及由是豐其飲膳嘉羞法饌動費萬
錢餽斂綱商其徒如市權勢熏灼人皆阿附及唐莊宗
滅梁室巖踰垣而逸素與徐州溫韜相善巖往依之旣
至韜斬巖首送京師

永樂大典卷一萬
六千九百九十

昶字大東準仲弟也弱冠習兵機沈默大度神形灑落
臨事有通變之才及兄準爲陳州刺史以昶爲防禦都

指揮使未幾巢將孟楷擁眾萬餘據項城縣昶與兄犇
領兵擊破之擒楷以歸不數月巢黨悉眾攻陳以報孟
楷之役又蔡寇合從凶醜百萬棲于陳郊陳人大恐一
夕昶因巡警假寐于闔閤恍惚間如有陰助昶異而待
之遲明開門決戰人心兵勢勇不可遏若有陰兵前導
是日擒賊將數人斬首千餘級羣凶氣沮其後連日交
戰無不應機俘斬未嘗小衄以至重圍數月士心如一
及賊敗圍解朝廷紀勳昶一門之中疊加爵秩當時方
鎮之內言忠勇者言守禦者言功勳者言政事者皆以
犇昶爲首焉及犇遙領泰寧軍節度以昶爲本州刺史

檢校右僕射俄而犇有疾遂以軍州盡付于昶詔授兵馬留後旋遷忠武軍節度使亦以陳州爲理所時宗權未滅中原方受其毒陳蔡封疆相接昶每選精銳深入蔡境蔡賊雖衆終不能抗以至宗權敗焉案上篇趙犇傳云蔡州平以犇爲忠武軍節度使據此傳則昶爲忠武節度使宗權未滅二傳自相矛盾見通鑑考異朝廷賞勳加檢校司徒昶以大寇削平之後益留心于政事勸課農桑大布恩惠景福元年秋陳許將吏耆老錄其功詣闕以聞天子嘉之命文臣撰德政碑植于通衢以旌其功俄加同平章事昶自圍解之後恆曰梁王之恩不敢忘也自後太祖每有征伐昶訓練兵甲饋輓供億無

有不至乾寧二年寢疾薨于鎮年五十三追贈太尉

永樂

大典卷一萬六千九百九十

珣字有節犖季弟也

案新唐書以珣爲犖子據歐陽史及通鑑皆以珣爲犖弟與薛史同

新唐書誤幼而剛毅器宇深沈旣冠好書籍及壯工騎射尤

精三略及犖爲陳州刺史以珣爲親從都知兵馬使時

巢黨東出商鄧與蔡賊會聚至百餘萬掘長壕五百道

攻陳陳人大懼珣與二兄堅心誓衆激厲將校約以死

節珣以祖先松楸去郭數里慮爲羣盜穿發乃夜縱心

脅之士遷柩入城府庫舊有巨弩數百枝機牙皆缺工

人咸謂不可用珣卽創意制度自調弦筈置之雉堞間

矢激五百餘步凡中人馬皆洞達胸腋羣賊畏之不敢逼近自仲秋至于首夏軍食將竭士雖不飽而堅拒之志不移會太祖率大軍解其圍珣兄弟投泣感謝其後朝廷議功加檢校右僕射遙領處州刺史肇薨昶爲忠武軍節度使珣遷爲行軍司馬檢校司空昶薨珣知忠武軍留後珣公幹之才播于遠邇至于符籍虛實財穀耗登備閔根本民之利病無不洞知庶事簡練公私俱濟太祖深加慰薦尋加特進檢校司徒充忠武軍節度使陳州土壤卑疎每歲壁壘摧圯公役不暇珣遂營度力用俾以甃周砌四墉自是無霖潦之虞光化二年加

檢校太保平章事明年檢校侍中進封天水郡公珣博
通前古以陳州本伏羲所都南頓乃光武舊地遂稽考
古制崇飾廟貌爲四民祈福之所又詢鄧艾故址決翟
王河以溉稻梁大實倉廩民獲其利珣兄弟節制陳許
繼擁節鉞共二十餘年陳人愛戴風化大行天復元年
冬韓建爲忠武軍節度使乃徵珣知同州匡國軍節度
留後時太祖統軍岐下珣輸輓調發旁午道途俄而昭
宗還長安詔徵入覲錫迎鑾功臣之號珣因堅辭藩鎮
遂加檢校太傅右金吾衛上將軍及扈從東遷歲餘以
痼疾免官遂歸淮陽未幾薨于私第年五十五詔贈侍

中陳人爲之罷市子穀仕至左驍衛大將軍宣徽北院

使唐莊宗入汴與從兄巖皆族誅

永樂大典卷一萬六千九百九十

王珂河中人祖縱鹽州刺史父重榮河東節度使破黃巢有大功封瑯琊郡王珂本重榮兄重建之子出繼重榮唐僖宗光啟三年重榮爲部將常行儒所害推重榮弟重盈爲蒲帥以珂爲行軍司馬及重盈卒軍府推珂爲留後時重盈子珙爲陝州節度使瑤爲絳州刺史由是爭爲部帥瑤珙連上章論列又與太祖書云珂非吾兄弟蓋余家之蒼頭也小字忠兒

案舊唐書忠作蟲

安得繼嗣

珂亦上章云亡父有興復之功又遣使求援于太原李

克用爲保薦于朝昭宗可之旣而珙厚結王行瑜李茂
貞韓建爲援三鎮互相表薦昭宗詔諭之曰吾以太原
與重榮有再造之功已俞其奏矣乾寧二年五月三鎮
率兵入覲賊害時政請以河中授珙瑤又連兵以攻河
中克用聞之出師以討三鎮瑤珙兵退晉師拔絳州擒
瑤斬之及克用駐軍于渭北昭宗以珙爲河中節度使
正授旄鉞克用因以女妻珙珙至太原謝婚成禮克用
令李嗣昭將兵助珙攻珙于陝焉光化末太祖謂張存
敬曰珙恃太原之勢侮慢鄰封爾爲我持一繩以縛之
天復元年春存敬兵下晉絳令何綢守晉州以扼太原

援師二月大軍逼河中珂妻書告太原曰敵勢攻逼朝夕爲俘虜因乞食于大梁矣大人安忍不救克用曰前途旣阻眾寡不敵救則與爾兩亡可與王郎歸朝廷珂復求救于李茂貞茂貞不答珂勢窮蹙卽登城謂存敬曰吾與汴王有家世事分公宜退舍俟汴王至吾自聽命存敬卽日退舍三月太祖自洛陽至先哭于重榮之墓蒲人聞之感悅珂欲面縛牽羊以見太祖曰太師阿舅之恩何時可忘郎君若以亡國之禮相見黃泉其謂我何

案新唐書全忠王出也始背賊事重榮約爲甥舅德其全已指日月曰我得志凡氏王者皆事之至是忘誓言過重

榮墓僞哭而祭及珂出迎于路握手歔歔聯轡而入乃

以居敬守河中珂舉家徙于汴後入覲被殺于華州傳

舍

永樂大典卷六千八百四十九

珙少有俊氣才兼文武性甚驕虐屬世多故遂代伯父

重霸爲陝州節度使爲政苛暴且多猜忌殘忍好殺不

以生命爲意內至妻孥宗屬外則賓幕將吏一言不合

則五毒並施鞭笞剝斮無日無之奢縱聚斂民不堪命

由是左右惕懼憂在不測唐光化二年夏六月爲部將

李璠所殺璠自稱留後因是陝州不復爲王氏所有

永樂

大典卷六千八百四十九

史臣曰紹威始爲唐雄據魏地當土德之季運倡梁祖

以強禪在梁則爲佐命也在唐則豈得爲忠臣乎趙犖
以淮陽咫尺之地抗黃巢百萬之衆功成事立有足多
者巖穀非賢遽混其嗣惜哉王珂奕世山河勢危被虜
乃魏豹之徒歟

永樂大典卷六
千八百四十九

補遺

王珂黃泉其謂我何歐陽史云太祖自同州降唐卽
依重榮以母王氏敬事重榮爲

舅

舊五代史卷十四終

舊五代史卷十四攷證

梁列傳四羅紹威傳其後宏信封臨清王 案舊唐書

宏信先封豫章郡公進封北平王與是書異

自田氏已後垂二百年 案吳縝歐陽史纂誤云魏博

自田承嗣專據至羅紹威時共一百五十餘年歐陽
史作二百年誤蓋歐陽史仍是書之誤也

太祖自內黃馳至鄴 至鄴原本作至葉今據歐陽史
改正

歲漕百萬石以給宿衛太祖深然之 案通鑑攷異引
梁功臣傳云紹威馳簡獻替意互合者十得五六太

祖嘆曰竭忠力一人而已又引莊宗實錄曰紹威陰有覆溫之志而賂溫益厚溫怪其曲事慮蓄奸謀而莫之察乃賜紹威妓妾數人未半歲召還以此得其陰事其紀載互異如此竊謂紹威有謀慮得梁主信任宜也然以梁主雄險而紹威又因盡誅牙軍有自弱之悔則此時猜忌諒亦有之未可偏廢其說

趙犖傳父叔文 案叔文原本訛叔父今據新唐書改正

王僊芝起于曹濮 僊芝原本作僊苾今據新舊唐書改正

文德元年 文德原本作大德今改正

充大內皇牆使 皇牆原本作皇城攷五代會要梁時避諱改皇城使爲皇牆使今改正

趙昶傳假寐于闔闔 闔闔原本作閭闔今改正

時宗權未滅 案上篇趙犇傳云蔡州平以犇爲忠武軍節度使據此傳則昶爲忠武節度使宗權未滅二傳互異

趙珣傳珣犇季弟也 案新唐書以珣爲犇子是書及歐陽史通鑑皆以珣爲犇弟新唐書應訛

王珂傳小字忠兒 忠兒舊唐書作蟲兒

令何綯守晉州 何綯原本作何緯今據通鑑改正

舊五代史卷十四攷證

舊五代史卷十五

宋司空同中書門下平章事薛居正等撰

列傳第五

梁書十五

韓建字佐時許州長社人父叔農世爲牙校初秦宗權之據蔡州招合亡命建隸爲軍士累轉至小校唐中和初忠武監軍楊復光起兵于蔡宗權遣其將鹿宴弘赴之建與里人王建俱隸宴弘軍入援京師賊平復光暴卒時僖宗在蜀宴弘率所部赴行在路出南山因攻剽郡邑據有興元宴弘自爲留後以建爲屬郡刺史唐軍容使田令孜密遣人誘建陷以厚利建時懼爲宴弘所

併乃率所部歸行在令孜補爲神策都校金吾將軍出爲潼關防禦使兼華州刺史河潼經大寇之後戶口流散建披荊棘闢污萊勸課農事植樹蔬果出入閭里親問疾苦不數年流亡畢復軍民充實建比不知書治郡之暇日課學習遣人于器皿牀榻之上各題其名建視之旣熟乃漸通文字俄遷華商節度潼關守捉等使累加檢校太尉平章事乾寧二年建與鳳翔李茂貞邠州王行瑜舉兵赴闕迫昭宗請以王珙爲河中帥害大臣于都下河中王珂召晉軍以爲援及晉軍渡河昭宗幸石門三年四月昭宗遣延王通王率禁兵討李茂貞爲

茂貞所敗車駕幸渭橋翊日次富平將幸河中建奉表
迎駕俄自至渭北懇乞東幸許之七月十五日昭宗至
華百官士庶相繼而至建尋加中書令充京畿安撫制
置等使又兼京兆尹京城把截使昭宗久在華州之境
思還宮掖每花朝月夕遊宴西溪與羣臣屬詠歌詩獻
歛流涕建每從容奏曰臣爲陛下修營大內結信諸侯
一二年間必期興復乃以建兼領修創京城使建自華
督役輦運工作復治大明宮四年二月有詣建告睦王
已下八王謀殺建案通鑑作防城將張行思等來告建
建惡諸王典兵故使行思等告之建
囚八王子別宅放散隨駕殿後軍二萬人殺捧日都頭

李筠自是天子益微宿衛之士盡矣八月建以兵圍十

六宅通王以下十一王並遇害于石堤谷以謀逆聞又

害太子詹事馬道殷將作監許巖士貶宰相朱朴皆昭

宗寵昵者也

案新唐書昭宗紀正月乙酉韓建以兵圍行宮殺扈蹕都將李筠二月韓建殺太子

詹事馬道殷

將作監許巖士八月韓建殺通王滋沂王

禪部王彭王

嗣韓王嗣陳王嗣覃王嗣周王嗣延王戒

不嗣丹王允

通鑑與新唐書同薛史以殺李筠爲正月

事以殺馬道

殷許巖士爲八月事蓋本于舊唐書昭宗

紀宜可

建尋兼同州節度使光化元年升華州爲興德

徵信云

建尋兼同州節度使光化元年升華州爲興德

府以建爲尹八月車駕還京九月冊拜太傅進封許國

公并賜鐵券天復元年十一月宦官韓全誨迫天子幸

鳳翔建亦預其謀太祖聞之自河中引軍而西前鋒至

同州建判官司馬鄴以城降遂移軍迫華州建懼乞降

太祖責以脅君之罪建拜伏稱從事李巨川之謀也太

祖卽誅巨川

案北夢瑣言韓建日某不識字凡朝廷章奏鄰封書檄皆巨川爲之因斬之通鑑所

采卽本于北夢瑣言與薛史同

新唐書李巨川傳云巨川詣軍門納款因言當世利害全忠屬官敬翔以文翰

事左右疑巨川用則全忠待己或衰乃詭說曰巨川誠奇才顧不利主人若何是日全忠殺之是巨川之死亦

由于敬翔之譖不太祖與建素有軍中昆弟之契及見

其怒驟息尋表爲許州節度使昭宗東遷以建爲佑國

軍節度使京兆尹車駕至陝召太祖與建侍宴宮妓奏

樂何皇后舉觴以賜太祖建躡足太祖遽起曰臣醉不

任僞若顛仆卽去建私謂太祖曰上與宮人附耳而語

幕下有兵仗聲恐圖王爾天祐三年改青州節度使及

受禪徵爲司徒平章事充諸道鹽鐵轉運使開平二年

加侍中充建昌宮使三年郊祀于洛以建爲大禮使建

爲上宰每謁見時有直言太祖性剛嚴羣下將迎不暇

待建稍異故優容之九月册拜太保罷知政事案五代

平三年十月詔曰太保韓建每月旦十五日入四年三

閣稱賀卽令赴朝參餘時勿入見示優禮也月除匡國軍節度使陳許蔡觀察使仍令中書不議除

替案五代會要乾化元年正月敕許昌雄鎮太保韓建

朕用以布政民耕盜止久居其位庶可勝殘矣宜令乾化二年六月朝廷新有內難人心動

中書門下不計搖部將張厚因作亂害建于衙署案通鑑考異引莊宗

實錄九月建遇害通

鑑從薛史時年五十八子從訓昭宗在華州時授太子侍學

賜名文禮尋拜屯田員外郎國初爲都官郎中賜紫年

未弱冠時朝廷命從訓告國哀于陳許至二日軍亂與

建併命乾化三年追贈太師

永樂大典卷三千六百七十五

李罕之陳州項城人父文世田家罕之拳勇趨捷力兼

數人少學爲儒不成又落髮爲僧以其無賴所至不容

曾乞食于酸棗縣自旦至晡無與之者乃擲鉢于地毀

棄僧衣亡命爲盜

案北夢瑣言云罕之卽其僧名

會黃巢起曹濮罕之

因合徒作剽漸至魁首及賊巢渡江罕之因以兵將背

賊歸于唐高駢錄其功表爲光州刺史歲餘爲蔡賊秦

宗權寇迫不能守乃棄郡歸項城收合餘眾依河陽諸葛爽爽署爲懷州刺史光啟初僖宗以爽爲東南面招討以擊宗權爽乃表罕之爲副令將兵屯宋州蔡寇兇熾日熾兵鋒不敵中和四年爽表罕之爲河南尹東都留守是歲李克用脫上源之難斂軍西歸路由洛陽罕之迎謁供帳館待甚優因與克用厚相結託時罕之有眾三千以聖善寺爲府光啟元年蔡賊秦宗權遣將孫儒來攻罕之對壘數月以兵少備竭委城而遁西保于澠池蔡賊據京城月餘焚燒宮闕剝削居民賊旣退去鞠爲灰燼寂無雞犬之音罕之復引其眾築壘于市西

明年冬諸葛爽死其將劉經推爽子仲方爲帥經懼罕
之難制自引兵鎮洛陽罕之部曲有李塘郭瑆者情不
相叶欲相圖害罕之怒誅瑆軍情由是不睦劉經因其
有間掩擊罕之于澠池軍亂保乾壕經急攻之爲罕之
所敗罕之乘勝追之洛陽時經保敬愛寺罕之保苑中
飛龍廐罕之激勵其衆攻敬愛寺數日因風縱火盡燔
之經衆奔竄追斬殆盡罕之進逼河陽營于鞏縣陳舟
于汜水將渡諸葛仲方遣將張言案張言後名全義率師拒于
河上時仲方年幼政在劉經諸將心多不附張言密與
罕之修好經知其謀言懼引衆渡河歸罕之因合勢攻

河陽爲經所敗罕之與言退保懷州冬蔡將孫儒陷河陽仲方汎輕舟來奔孫儒遂自稱節度使俄而蔡賊爲我軍所敗孫儒棄河陽歸蔡罕之與言收合其衆求援于太原李克用遣澤州刺史安金俊率騎助之遂收河陽克用表罕之爲節度同平章事又表言爲河南尹東都留守罕之旣與言患難交契刻臂爲盟永同休戚如張耳陳餘之義也罕之雖有膽決雄猜反復而撫民御衆無方略率多苛暴性復貪冒不得士心旣得河陽出兵攻晉絳時大亂之後野無耕稼罕之部下以俘剽爲資啖人作食絳州刺史王友遇以城降罕之乃進攻晉

州河中王重盈遣使求援于太祖時張言治軍有法善積聚勤于播植軍儲不乏言輸粟于罕之以給其軍罕之求索無限言頗苦之力不能應罕之則錄河南府吏笞責之東諸侯修貢行在多爲罕之邀留王重盈苦其侵削密結張言請圖之文德元年春會罕之盡出其衆攻平陽言夜出師掩擊河陽罕之無備單步僅免舉族爲言所俘罕之奔于太原李克用表爲澤州刺史仍領河陽節度使三月克用遣其將李存孝率師三萬助之來攻懷孟城中食盡備禦皆竭張言遣其孥入質且求救于太祖太祖遣葛從周牛存節赴之逆戰于沈河店

會晉將安休休以一軍奔于蔡存孝引軍而退罕之保
于澤州自是罕之日以兵寇抄懷孟晉絳數百里內郡
邑無長吏閭里無居民河內百姓相結屯寨或出樵汲
卽爲俘馘雖奇峯絕磴梯危架險亦爲罕之部眾攻取
先是蒲絳之間有山曰摩雲邑人立柵于上以避寇亂
罕之以百餘人攻下之軍中因號罕之日李摩雲自是
數州之民屠啖殆盡荆棘蔽野烟火斷絕凡十餘年乾
寧元年李存孝出師以拒邠鳳營于渭北天子以克用
爲邠州行營四面都統克用乃表罕之爲副及誅王行
瑜罕之以功授檢校太尉食邑千戶

案新唐書克用討
王行瑜表罕之副

都統檢校侍中行瑜誅封隴西郡王檢校太尉兼
侍中所載爵位較薛史爲詳歐陽史仍薛史之舊
罕之自以功多私謂晉將蓋寓曰余自河陽失守來依巨蔭
歲月滋久功效未施比年以來倦于師旅所謂老夫耄
矣無能爲也望吾王仁愍太傅哀憐與一小鎮休兵養
疾一二年間卽歸老菟裘幸也寓爲言之克用不對每
藩鎮缺帥議所不及罕之私心鬱鬱蓋寓懼其它圖亟
爲論之克用曰吾于罕之豈惜一鎮吾有罕之亦如董
卓之有呂布雄則雄矣鷹鳥之性飽則颺去實懼翻覆
毒余也光化元年十二月晉之潞帥薛志勤卒罕之乘
其喪自澤州率眾徑入潞州自稱留後以狀聞于克用

日聞志勤之喪將帥未至慮爲佗盜所窺不俟命已屯

于潞矣克用怒遣李嗣昭討之罕之執其守將馬溉伊

鐸何萬友

案伊鐸歐陽史作伊鐸

沁州刺史傅瑤等遣其子顥

案

陽史作

遣子願拘送于太祖以求援焉

案新唐書全忠表罕之昭義軍節度使

會

罕之抱病不能視事明年六月病篤太祖令丁會代之

移罕之爲河陽節度使行至懷州卒于傳舍時年五十

八其子顥以舟載柩歸葬河陰縣開平二年春詔贈中

書令

永樂大典卷一萬三百八十七

馮行襲字正臣武當人也歷職爲本郡都校中和中僖

宗在蜀有賊首孫喜者聚徒數千人欲入武當刺史呂

煜惶駭無策略行襲伏勇士于江南乘小舟逆喜謂喜

曰郡人得良牧眾心歸矣但緣兵多民懼擄掠若駐軍

江北領肘腋以赴之使某前導以慰安士民可立定也

喜然之既渡江軍吏迎謁伏甲奮起行襲擊喜仆地仗

劍斬之其黨盡殪賊眾在江北者悉奔潰

案新唐書本紀光啟元年

四月武當賊馬行襲陷均州逐其刺史李曄蓋行襲既殪孫喜遂自據其郡也薛史作中和間事與唐書異歐

陽史仍從薛史

山南節度使劉巨容以功上言尋授均州刺史

州西有長山當襄漢蜀路羣賊屯據以邀劫貢奉行襲

又破之洋州節度使葛佐奏辟爲行軍司馬請將兵鎮

谷口通秦蜀道由是益知名李茂貞遣養子繼臻竊據

金州行襲攻下之因授金州防禦使時興元楊守亮將襲京師道出金商行襲逆擊大破之詔升金州爲節鎮以戎昭軍爲額卽以行襲爲節度使案舊唐書哀帝紀天祐二年金州馮行襲奏當道昭信軍額內一字與元帥全忠諱字同乃賜號戎昭軍是金州初賜軍額本名昭信至哀帝避朱全忠祖諱乃改稱戎昭也薛史于金州初賜軍額卽作戎昭蓋仍梁實錄之舊未及考正及太祖義旗西征行襲遣副使魯崇矩稟受制令會唐昭宗幸鳳翔太祖帥師奉迎久之未出中尉韓全誨遣中官郗文宴等二十餘人分命矯詔欲徵江淮兵屯于金州以脅太祖之軍行襲定策盡殺之收其詔勅送于太祖天祐元年兼領洋州節度使太祖之伐荆襄行襲令其子勗

以舟師會于均房預收復功

案新唐書昭宣帝紀二年五月王建陷金州戎昭軍

節度使馮行襲奔于均州六月行襲克金州舊唐書哀帝紀二年十二月戎昭軍奏收復金州兵火之後并邑

殘破請移理所于均州從之仍改爲武定軍是遷匡國行襲因金州嘗被陷乃改治軍州也薛史不載

軍節度使

案舊唐書哀帝紀三年四月丙申勅曰天祐二年九月二十日于金州置戎昭軍割均房

二州爲屬郡比因馮行襲叶贊元勲克宣丕績用獎濟師之效遂行割地之權今命帥得人酬庸有秩其戎昭軍額宜停其均房二州却還山南東道收管據此到任則戎昭軍額廢于天祐三年故行襲改鎮許州也

誅大吏張澄暴其罪州人莫不懽懽在許三年上供外

別追助軍羨糧二十萬石及太祖郊禋行襲請入覲貢

獻巨萬恩詔殊厚尋詔翰林學士杜曉撰德政碑以賜

之累官至兼中書令冊拜司空開平中卒輟朝一日贈

太傅諡曰忠敬行襲性嚴烈爲政深刻然所至有天幸
境內有大蝗尋有羣鳥啄食不爲害民或艱食必有糴
穀出于隴畝雖威福在已而恆竭力以奉于王室故能
保其功名行襲魁岸雄壯面有青誌當時目爲馮青面
長子勗歷蘄沁二州刺史次子德晏仕至金吾將軍

永樂

大典卷
四萬三

孫德昭鹽州五原縣人世爲州校父惟政有功于唐朝
遙領荆南節度分判右神策軍事德昭藉父蔭累職爲
右神策軍都指揮使

案通鑑德昭由雄毅軍
使爲左神策指揮使

光化三年

唐昭宗爲闔官所廢矯立德王時中外以權在禁闥莫

能致討近藩朋附章表繼有至者丞相崔胤外與太祖

申結輔佐之好內遣心腹密購忠義有以事諭德昭者

案通鑑云德昭曾憤惋不平崔胤聞之遣判官石戢與之遊德昭每酒酣必泣戢知其誠乃密以胤意說之

德昭感慨乃與本軍孫承誨董從實三人

案新舊唐書俱作周承誨

董彥弼據薛史則承誨自姓孫彥弼乃從實後改之名也通鑑從唐書歐陽史從薛史

奮發應命

誓圖返正崔又割衣手筆以通其志天復元年正月一

日未旦逆豎左軍容劉季述早入德昭伏甲要路以俟

追其前驅邀而斬之孫承誨分捕右軍容王仲先黨伍

唐昭宗方幽辱東內聞外喧大恐德昭馳至扣閤曰逆

賊劉季述伏誅矣請上皇開鑰復皇帝位皇后何氏呼

日汝可進逆人首門乃可開俄而承誨從實俱以馘獻
昭宗悲而嘉之于是丞相崔胤奉迎御丹鳳樓率百辟
待罪泣且奏曰臣居大位不能討姦賴東平王全忠首
奮忠貞誅殺邸吏遂致德昭等擒戮妖逆再清禁闈卽
日議功以德昭爲檢校太保靜海軍節度使承誨邕州
節度使從實容州節度使並同平章事錫姓李賜號扶
傾濟難忠烈功臣圖形凌烟閣俱留京師錫賚宴賞之
厚恩寵權倖之勢近代罕比其年十一月閹官韓全誨
縱火脅昭宗西幸鳳翔承誨從實並變節爲中官所誘
始欲驅擁百寮將圖出令而德昭猶按兵與太祖親吏

婁敬思叶力衛丞相及文武百官與長安吏民保于街東免爲所劫太祖遣從事相繼勞問遺以龍鳳劍鬪雞紗委令制輯于是百官次華州連狀請太祖迎奉及大旆入關德昭以軍禮上謁立道左太祖命左右扶騎控至長安賜與甚厚署權知同知節度留後將赴任復徇民請留充兩街制置使賜錢百萬德昭以本部兵八千人獻于太祖由是愈見賞重又賜甲第一區俾先還洛陽及昭宗東遷奏授左威衛上將軍以疾免歸于別墅太祖受禪以左領衛上將軍徵赴闕開平四年拜左金吾大將軍充街使末帝卽位俾將命于兩浙對見失儀

不果行尋改授右武衛上將軍俄復左金吾大將軍卒
于官詔贈太傅輟視朝一日天復初德昭與孫承誨董
從實以返正功時人呼爲三使相恩澤俱冠世及承誨
至鳳翔易名繼誨從實改名彥弼皆爲李茂貞所養後
閹官之敗俱戮于京師唯德昭克全終始有所稱云

永樂

大典卷一萬八
千一百四十六

趙克裕河陽人也祖父皆爲軍吏克裕少爲牙將好讀
書謹儀範牧伯皆奇待之累居右職擢爲虎牢關使光
啟中蔡寇陷河陽克裕率所部歸于太祖隸于宣義軍
太祖東征徐鄆克裕屢受指顧無不如意數年之內繼

領亳鄭二州刺史時關東藩鎮方爲蔡寇所毒黎元流
散不能相保克裕妙有農戰之備復善于綏懷民賴而
獲安者眾太祖表爲河陽節度使檢校右僕射尋移理
許田

案新唐書本紀景福元年已未朱全忠陷孟州逐
河陽節度使趙克裕據通鑑則克裕之移鎮因梁

祖欲以張全義領河陽也
新唐書所紀疑非事實

入爲金吾衛大將軍檢校司

空及太祖爲元帥以克裕爲元帥府左都押衙復統六
軍兗州平命權知泰寧軍留後數月暴疾而卒開平初
追贈太保

永樂大典卷一萬
八千一百二十六

張愼思清河人自黃巢軍來歸累授軍職歷諸軍都指
揮使從平巢蔡兗鄆皆著功表授檢校工部尙書兼宋

州長史光化中加檢校右僕射權知亳州天復三年昭
宗還長安以從太祖迎駕功賜號迎鑾毅勇功臣尋除
汝州防禦使天祐元年授左龍武統軍其冬除許州匡
國軍節度使明年十一月權知徐州武寧軍兩使留後
太祖受禪入爲左金吾大將軍開平二年除宋州刺史
未幾復拜左金吾大將軍三年冬除蔡州刺史以貪貨
大失民情詔追赴闕未幾扈從北征還以疾臥洛陽之
私第馭家不肅爲其子所弑

永樂大典卷六
千三百五十

史臣曰韓建遇唐朝之衰運據潼關之要地不能藩屏
王室翻務斲喪宗枝雖有阜俗之能何補不臣之咎罕

之負驍雄之氣蓄嚮背之謀武皇比之呂布斯知人矣
行襲勵納忠之節德昭立反正之功俱善其終固其宜
矣克裕而下無譏可也

永樂大典卷六
千三百五十

舊五代史卷十五終

舊五代史卷十五攷證

梁列傳五韓建傳又害太子詹事馬道殷將作監許巖士
案新唐書昭宗紀正月乙酉韓建殺扈蹕都將
李筠二月殺太子詹事馬道殷將作監許巖士八月
殺通王滋沂王禪韶王彭王嗣韓王嗣陳王嗣覃王
嗣周王嗣延王戒丕嗣丹王允通鑑與新唐書同是
書以殺李筠爲二月事以殺馬道殷許巖士爲八月
事蓋本于舊唐書昭宗紀

李罕之傳伊鐸 案歐陽史作伊鐸

遣其子顥 案歐陽史作遣子頤

馮行襲傳尋授均州刺史 案新唐書本紀光啟元年
四月武當賊馮行襲陷均州逐其刺史呂煜蓋行襲
既殪孫喜遂自據其郡也是書作中和間事與唐書
異歐陽史仍從是書

孫德昭傳父惟最有功於唐朝 案惟最歐陽史作惟
最攷新唐書亦作惟最今仍其舊

乃與本軍孫承誨董從實三人 案孫承誨董從實新
舊唐書並作周承誨董彥弼攻承誨姓周與孫未知
孰是從實改名彥弼見本傳後文歐陽史與是書同
趙克裕傳尋移理許田 案克裕移理許田是書未明

言其故新唐書本紀朱全忠陷孟州逐河陽節度使
趙克裕據通鑑則克裕移鎮因梁祖欲以張全義領
河陽也新唐書所紀疑非事實

舊五代史卷十五攷證

舊五代史卷十六

宋司空同中書門下平章事薛居正等撰

列傳第六

梁書十六

葛從周字通美濮州鄆城人也曾祖阮祖遇賢父簡累
贈兵部尙書從周少豁達有智畧初入黃巢軍漸至軍
校唐中和四年三月太祖大破巢軍于王滿渡從周與
霍存張歸霸兄弟相率來降七月從太祖屯兵于西華
破蔡賊王夏寨太祖臨陣馬踣賊衆來追甚急從周扶
太祖上馬與賊軍格鬪傷面矢中于肱身被數槍奮命
以衛太祖賴張延壽迴馬轉鬪從周與太祖俱免退軍

激水諸將並削職惟擢從周延壽爲大校其後入長葛
靈井大敗蔡賊至斤溝淝河殺鐵林三千人獲九寨都
虞候王涓太祖遣郭言募兵于陝州有黃花子賊據于
溫谷從周擊破之又破秦賢之衆于滎陽尋佐朱珍收
兵于淄青間時兗州齊克讓軍于任城從周敗之擒其
將呂全眞淄人不受制復與之戰獲其驍將鞏約會青
州以步騎萬餘人列三寨于金嶺以阨要害從周與朱
珍大殲其衆擄其將楊昭範五人而還至大梁不解甲
徑至板橋擊蔡賊破盧塘寨塘自溺而死又于赤橋壩
殺蔡軍二萬餘人從討謝殷于亳州擒之迴襲曹州擄

刺史丘弘禮以歸與兗鄆軍遇于臨濮之劉橋殺數萬人朱瑄朱瑾僅以身免擒都將鄒務卿以下五十人從太祖攻范縣復與朱瑄戰虜尹萬榮等三人遂平濮州未幾與朱珍擊蔡賊于陳濮間獲都將石璠文德元年魏博軍亂樂從訓來告急從太祖渡河拔黎陽李固臨河等鎮至內黃破魏軍萬餘衆獲其將周儒等十人李罕之引并人圍張全義于河陽從周與丁會張存敬牛存節率兵赴援大破并軍殺蕃漢二萬人解河陽之圍以功表授檢校工部尙書從朱珍討徐州拔豐縣敗時溥于吳康得其輜重加檢校刑部尙書佐龐師古討孫

儒于淮南畧地至廬壽滁等州下天長高郵破邵伯堰
迴軍攻濠州殺刺史魏勳得餉船十艘大順元年八月
并帥圍潞州太祖遣從周率敢死之士夜銜枚犯圍而
入會王師不利于馬牢川卽棄上黨而歸其年十二月
與丁會諸將討魏州連收十邑明年正月大破魏軍于
永定橋魏軍五敗斬首萬餘級十月佐丁會攻宿州從
周壅水灌其城刺史張筠以郡降從討兗州破朱瑾之
軍于馬溝景福二年二月與諸將大破徐兗之兵于石
佛山八月與龐師古同攻兗州乾寧元年三月軍至新
泰縣朱瑾令都將張約李胡椒率三千人來拒戰師古

遣從周張存敬掩襲生擒張約李胡椒等都將數十人

二年十月圍兗州兗人不出從周詐揚言并人鄆人來

救

案通鑑十二月朱瑄朱瑾告急于河東李克用遣大

史儼李承嗣將數千騎假道于魏以救之是河東實

遣

未至乃揚言已至多方以誤之耳又本紀作十二月

此作十月辨卽引軍趨高吳夜半却潛歸寨朱瑾果出

兵攻外壕我軍士突出掩殺千餘人生擒都將孫漢筠

從周累立戰功自懷州刺史厯曹宿二州刺史累遷檢

校左僕射三年五月并帥以大軍侵魏遣其子落落率

二千騎屯洹水從周以馬步二千人擊之殺戮殆盡擒

落落于陣并帥號泣而去遂自洹水與龐師古渡河擊

鄆四年正月下之從周乘勝伐兗會朱瑾出師在徐境

其將康懷英以城降以功授兗州留後檢校司空

玉堂閒話

云葛侍中鎮兗之日威名著于敵中河北諺曰山東一條葛無事莫撩撥

復領兵萬餘人渡

淮討楊行密至壕州聞龐師古清口之敗遽班師

案九國志

侯瓚傳云破葛從周于壽陽沈其卒萬餘人于淝河與薛史異歐陽史兼采九國志

光化元年四

月率師經畧山東時并帥以大軍屯邢洛從周至鉅鹿

與并軍遇大破之并帥遁走我軍追襲至青山口數日

之內邢洛磁三州連下斬首二萬級獲其將吏一百五

十人卽以從周兼領邢州留後十月復破并軍五千騎

于張公橋晉將李嗣昭急攻邢州陣于城門外從周大

破之擒蕃將賁金鐵慕容騰百餘人二年春幽州劉仁恭率軍十萬寇魏州屠貝郡從周自邢臺馳入魏州燕軍突上水關攻館陶門從周與賀德倫率五百騎出戰謂門者曰前有敵不可返顧命閤其門從周等極力死戰大敗燕人擒都將薛突厥王鄒郎等翌日破其八寨追擊至臨清劉仁恭走滄州從周授宣義軍行軍司馬五月并人討李罕之于潞州太祖以丁會代罕之令從周馳入上黨七月并人陷澤州太祖召從周令賀德倫守潞州德倫等尋棄城而歸三年四月領軍討滄州先攻德州下之及進攻浮陽幽州劉仁恭大舉來援時都

監蔣立暉謂諸將曰吾王命我護軍志在攻取今燕帥來赴不可外戰當縱其入壁聚食困廩力屈糧盡必可取也從周對曰兵在機機在上將非督護所言也乃令張存敬氏叔琮守其寨從周逆戰于乾寧軍老鴟堤大破燕軍斬首三萬獲將佐馬慎交已下百餘人奪馬三千匹八月并人攻邢洺從太祖破之從周追襲至青山口斬首五千級獲其將王郃郎楊師悅等得馬千匹表授檢校太保兼徐州兩使留後尋爲兗州節度使天復元年三月與氏叔琮討太原從周以兗鄆之衆自土門路入與諸軍會于晉陽城下以糧運不給班師頃之從

周染疾會青州將劉鄩陷兗州太祖命討之遂力疾臨
戎三年十一月鄩舉城降以功授檢校太傅太祖以從
周抱疾既久命康懷英代之授左金吾上將軍以夙恙
不任朝謁改右衛上將軍致仕養疾偃師縣亳邑鄉之
別墅頃之授太子太傅依前致仕末帝卽位制授潞州
節度使令坐食其俸加開府儀同三司檢校太師兼侍
中封陳留郡王累食邑至七千戶命近臣齎旌節就墅
以賜之貞明初卒于家冊贈太尉

永樂大典卷二
萬一千二百九

謝彥章許州人幼事從周爲養父從周憐其敏慧教以
兵法常以千錢于大盤中布其行陣偏伍之狀示以出

沒進退之節彥章盡得其訣及壯事太祖爲騎將末帝
嗣位用爲兩京馬軍都軍使累與晉軍接戰有功尋領
河陽節度使及從周卒臨喪行服躬預葬事時人義之
彥章後爲許州節度使檢校太傅貞明四年冬滑州節
度使賀瓌爲北面招討使彥章爲排陣使同領大軍駐
于行臺寨與晉人對壘彥章時領騎軍與之挑戰晉人
或望我軍行陣整肅則相謂曰必兩京太傅在此也不
敢以名呼其爲敵人所憚如此是時咸謂賀瓌能將步
軍彥章能領騎士旣名聲相軋故瓌心忌之一日與瓌
同設伏于郊外瓌指一方地謂彥章曰此地岡阜隆起

中央坦夷好列柵之所尋而晉人舍之故瓌疑彥章與
晉人通又瓌欲速戰彥章欲持重以老敵人瓌益疑之
會爲行營馬步都虞候朱珪所誣珪遂與瓌協謀因享
士伏甲以殺彥章及濮州刺史孟審澄別將侯溫裕等
于軍以謀叛聞晉王聞之喜曰彼將帥如是亡無日矣
審澄溫裕亦善將騎軍然所領不過三千騎多而益辦
惟彥章有焉將畧之外好優禮儒士與晉人對壘于河
上恒褒衣博帶動皆由禮或臨敵御衆則肅然有上將
之威每敦陣整旅左旋右抽雖風馳雨驟亦無以喻其
迅疾也故當時騎士咸樂爲用及其遇害人皆惜之

永樂

大典卷一萬八千一百二十六

胡眞江陵人也體貌洪壯長七尺善騎射少爲縣吏及

在巢寇中寇推爲名將隨巢涉淮浙陷許洛入長安及

太祖以衆歸唐時眞爲元從都將

案舊唐書中和二年

睦來降通鑑

云溫見巢兵勢日蹙知其將亡親將胡眞

謝睦勸溫歸

國薛史謝睦傳載睦說溫之辭胡眞傳不

言其勸溫歸國與通鑑異

從至梁苑表授檢校刑部尙書頻從破巢

蔡于陳鄭間尋以奇兵襲取滑州乃署爲滑州節度留

後復表爲鄭滑節度使檢校右僕射數年徵爲右金吾

衛大將軍俄拜寧遠軍節度使容州刺史檢校太保卒

贈太傅

永樂大典卷一萬八千一百二十六

張歸霸字正臣清河人祖進言陽穀令父實亦有宦績
少倜儻好兵術唐乾符中寇盜蜂起歸霸率昆弟三人
棄家投黃巢頗以勇畧聞巢陷長安遂署爲左番功臣
中和中巢領徒走宛丘時太祖在汴奉詔南討巢黨日
窘歸霸昆仲與葛從周李讜等相率來降尋補宣武軍
劇職光啟二年與蔡將張存戰于盧氏三年夏又與蔡
將盧瑋戰于商丘復與秦宗賢戰于萬勝皆敗而殲之
翌日宗權遣將張晙來寇列寨于赤峴一日出騎將較
勝歸霸爲飛戈所中

飛戈歐陽
史作飛矢

卽拔馬却逸控弦一發

卽洞頸而墜遂兼騎而還太祖時于高丘下瞰備見其

狀面加賞激厚以金帛及所獲馬錫之又嘗被命以控
弦之士五百人伏于壕內太祖統數百騎稍逼其寨蔡
人果以銳士摩壘來追歸霸發伏兵掩殺千餘人奪馬
數十匹尋奏授檢校左散騎常侍其後從太祖伐鄆副
李唐賓渡淮咸著奇績文德初大軍臨蔡州賊將蕭顯
來斫寨歸霸與徐懷玉各以所領兵自東南二扉分出
合勢殺賊蔡人大敗及太祖整衆離營寇塵已息太祖
召至賞之曰昔耿弇不俟光武擊張步言不以賊遺君
父弇之功爾其二焉大順中郭紹賓拔曹州歸霸率兵
數十守之俄而朱瑾統大軍自至歸霸與丁會逆擊之

于金鄉瑾大敗擒賊將宗江等七十餘人曹州以寧明
年破濮州生擒刺史邵儒又佐葛從周與晉軍戰于洹
水生獲克用愛子落落復與燕人戰于內黃殺仁恭兵
三萬餘衆戎績超特居諸將之右累官至檢校左僕射
光化二年權知邢州事明年春李嗣昭以蕃漢五萬來
寇歸霸堅壁設備晉軍不敢顧其城遂移軍攻洺州陷
焉時太祖在滑頗慮邢之失守及葛從周復洺嗣昭北
遁歸霸出兵襲之殺二萬餘衆捷至賞卹殊等旋以功
奏加檢校司空天祐初遷萊州刺史秩滿授左衛上將
軍又除曹州刺史其秋加檢校司徒副劉知俊禦邠鳳

之寇敗之太祖受禪拜右龍虎統軍改左驍衛上將軍
充河陽諸軍都指揮使明年夏六月就除河陽節度使
檢校太保尋加同平章事二年秋七月卒于位詔贈太
傅梁末帝德妃張氏卽歸霸女也末帝嗣位以歸霸子
漢鼎漢傑並爲近職漢鼎早亡漢傑貞明中爲控鶴指
揮使領兵討惠王于陳州擒之當貞明龍德之際漢傑
昆仲分掌權要藩鎮除拜多出其門段凝因之遂竊兵
柄及莊宗入汴漢傑與兄漢倫弟漢融同日族誅于汴
橋下

永樂大典卷六
千三百五十

張歸厚字德坤

案通鑑考異引梁功臣列傳云歸厚祖
興父處讓薛史歸厚傳不言其父祖名

號當是歸
霸從弟

少驍勇有機畧尤長于弓槊之用中和末與

兄歸霸自巢軍相率來降太祖畧爲軍校時淮西兵力
方壯太祖之師尙寡歸厚以少擊衆往無不捷光啓三
年春與秦宗賢戰于萬勝大破之其夏蔡將張晁以數
萬衆屯于赤峒歸厚嘗與晁鬪于陣晁不能支而奔師
徒乘此大捷太祖大悅立畧爲騎軍長仍以鞍馬器幣
錫之及佐朱珍討時溥寨于豐蕭之間歸厚乘徐壘如
行坦途甚爲諸將歎伏龍紀初奏遷檢校工部尙書其
年冬復伐徐歸厚以偏師徑進至九里山下與徐兵遇
時我之叛將陳璠在賊陣中歸厚忽見之因瞋目大罵

單馬直往期于必取會飛矢中左目而退徐戎甚衆莫敢追之大順元年奏加檢校兵部尙書又命統親軍是歲邲王遷寨未知所往忽逢兗鄆賊寇甚衆太祖亟登道左高阜以觀之命歸厚領所部廳子馬直突之出沒二十餘合賊大敗將北而救軍雲至歸厚卽綴賊苦戰請太祖以數十騎先還時歸厚所乘馬中流矢而蹄乃持槊步鬪漸退賊不敢逼太祖至寨亟命張筠劉儒飛騎來迎然謂已歿矣歸厚體被二十餘箭尙復拒戰筠等旣至賊解乃歸太祖見之撫背泣下曰得歸厚身全縱廣喪戎馬何足計乎便令肩舁歸汴日降問賚恩旨

甚厚尋遷中軍指揮使景福初從太祖伐鄆帝軍不利太祖爲寇所逼歸厚殿焉翼衛左右馳射矢發如雨賊騎千百披靡而退明年與葛從周禦晉軍于洹水殊績尤著詔加檢校右僕射其後討滄州復洺州咸以功聞太祖錄其勲命權知洺州事是郡嘗兩爲晉人所陷并邑蕭條歸厚撫之數月之內民庶翕然太祖自鎮定還覩其緝理之政大喜賞之天復元年冬眞拜洺州刺史加檢校右僕射尋授絳州刺史三年秋改晉州刺史仍檢校司空唐帝遷都洛陽除右神武統軍天祐二年改左羽林統軍與徐懷玉同守澤州時晉軍五萬來攻郡

中戎士甚寡歸厚竭力拒守并軍乃還太祖受禪加檢校司空開平二年夏劉知俊以同州叛歸厚副楊師厚劉鄩等討平之秋軍還授亳州團練使乾化元年拜鎮國軍節度使陝虢等州觀察處置等使明年夏以疾卒于位詔贈太師子漢卿

永樂大典卷一萬八千一百二十六

張歸弁字從冕始與兄歸霸歸厚同歸于太祖得署爲牙校時太祖初鎮宣武屢命歸弁結好于近境頗得行人之儀乾寧中以偏師佐葛從周禦并軍于洹水光啟中又佐張存敬與燕人戰于內黃積前後功表授檢校工部尙書大順初攻討兗鄆命歸弁佐衡王友諒屯單

父軍聲甚振尋爲齊州指揮使屬青帥王師範叛遣將詐爲賈人挽車數十乘匿兵器于其中將謀竊發歸弁察而擒之州城以寧明年春青寇大舉來伐州兵旣寡民意頗搖有本郡都將康文爽等三人欲謀外應卽時擒獲誅之人心遂定歸弁又罄發私帑賞給士伍青人遂遁青州平超加檢校右僕射遙領愛州刺史從征荆襄迴轉檢校右僕射天祐三年春太祖入魏誅牙軍魏之郡邑多叛歸弁與諸將等分布攻討封境悉平而歸弁于高唐攻賊太猛飛矢中于臆太祖嘉之命賜鞍勒馬一匹金帶一條夏五月命權知晉州冬十一月眞授

晉州刺史加檢校司空太祖受禪改滑州長劍指揮使
開平二年秋九月并軍圍平陽詔歸弁統兵救之軍至
解其圍加檢校司徒三年春三月寢疾卒于滑州之私
第子漢融

永樂大典卷六
千三百五十

史臣曰從周以驍武之才事雄猜之主而能取功名于
馬上啟手足于牖下靜而言之斯爲賢矣彥章蔚有將
才死于讒口身旣歿矣國亦隨之惜哉歸霸昆仲皆脫
身于巨盜之流宣力于興王之運由介冑而析圭爵可

不謂壯夫歟

永樂大典六
千三百五十

舊五代史卷十六終

舊五代史卷十六攷證

梁書列傳六葛從周傳破蔡賊王夏寨 王夏原本作

五夏今據通鑑改正

從周詐揚言并人鄆人來救 案通鑑朱瑄朱瑾告急

于河東李克用遣大將史儼李承嗣將數千騎假道

于魏以救之是河東實遣師來援非從周詐言也此

蓋規知兗人告急乘并師尙未至乃揚言已至多方

以誤之耳又本紀作十二月此作十二辨正已見本

紀

養疾偃師縣亳邑鄉之別墅 別墅原本作別塋今改

舊五代史卷十六 正

謝彥章傳必兩京太傅在此也 兩京原本作西京今

據通鑑改正

張歸霸傳歸霸爲飛戈所中 飛戈歐陽史作飛矢

張歸厚傳命歸厚領所部廳子馬 廳子馬原本作厲

子馬攷通鑑注廳子都係當時軍旅之名今改正

與葛從周禦晉軍于洹水 葛從周原本作郭從周今

據通鑑改正

舊五代史卷十六攷證

舊五代史卷十七

宋司空同中書門下平章事薛居正等撰

列傳第七

梁書十七

成汭淮西人少年任俠乘醉殺人爲讎家所捕因落髮

爲僧冒姓郭氏

案新唐書云入蔡賊中爲賊帥假子更姓名爲郭禹

亡匿久之及

貴方復本姓

永樂大典卷一萬八千八百二十

唐僖宗朝爲蔡州軍校

領本郡兵戍荆南帥以其兇暴欲害之遂棄本軍奔于

稀歸一夕巨蛇繞其身幾至于殞乃祝曰苟有所負死

生惟命逡巡蛇亦解去後據歸州招輯流亡練士伍得

兵千餘人泐流以襲荆南遂據其地朝廷卽以旄鉞授

之

永樂大典卷五千九百四十

是時荊州經巨盜之後居民才一十

七家內撫輯凋殘勵精爲理通商訓農勤于惠養比及

末年僅及萬戶

永樂大典卷一萬一千八百一十七

內性豪暴事皆意斷

又好自矜伐騁辯凌人深爲識者所鄙

永樂大典卷二千九百九十八

初澧朗二州本屬荆南乾寧中爲土豪雷滿所據內奏

請割隸唐宰相徐彥若執而不行內由是銜之及彥若

出鎮南海路過江陵內雖加延接而猶怏怏嘗因對酒

語及其事彥若曰令公位尊方面自比桓文雷滿者偏

州一草賊爾令公何不加兵而反怨朝廷乎內赧然而

屈

永樂大典卷云萬一千一百二十八

累官至檢校太尉封上谷郡王楊

行密以兵圍鄂州。汭出師以援鄂。淮寇乘之以火焚其艦。汭投江而死。天祐三年夏，太祖以汭沒于王事，上表

于唐帝，請爲汭立廟于荆門，優詔可之。

永樂大典卷一萬一千八百三

十七 案成汭傳：永樂大典闕全編，今就散見六條。篇次如右：五代史補鄭準不知何許人，性諒直，能爲文章，長于箋奏。成汭鎮荆南，辟爲推官。汭嘗讎殺人，懼爲吏所捕，改姓郭氏，及爲荆南節度使，命準爲表乞歸本姓。準援筆而成，其畧云：臣門非冠蓋，家本軍戎，親朋之內，盱眙爲人，報怨昆弟之間，點染無處，求生背故，國以狐疑，望鄰封而鼠竄，名非霸越，乘舟難效，于陶朱志切投秦出境，遂稱于張祿。又云：成爲本姓郭，乃冒稱本避犯禁之辜，敢歸司寇，別族受封之典，誠愧諸侯，伏乞聖慈，許歸本姓。云云。其表甚爲朝廷所重。後因汭生辰，淮南楊行密遣使致禮幣之外，仍貺初學記一部。準忿然以爲不可，謂汭曰：夫初學記蓋訓童之書，爾今敵國交聘，以此書爲貺，得非相輕之甚耶？卽宣書責讓，汭不納。準自嘆曰：若然，見輕敵國，足彰幕府之無人也。參佐無狀。

安可久遽請解職納怒其去潜使人于途中殺之

杜洪者江夏伶人

案新唐書洪鄂州人

鍾傳者豫章小校

案新唐書傳洪

州高安人

唐光啟中秦宗權兇焰颺起屢擾江淮郡將不能

城守洪傳各爲部校因戰立威逐其廉使自稱留後朝

廷因而命之

案新唐書光啟二年洪乘虛入鄂自爲節度留後僖宗卽拜本軍節度使中和三年

傳逐江西觀察使高茂卿遂有洪州僖宗擢傳江西團練使俄拜鎮南節度使

及爲楊行密所

攻洪傳首尾相應皆遣求援于太祖太祖遣朱友恭赴

之大破淮寇于武昌二鎮稍寧及行密乘勝急攻洪鄂

洪復乞師于太祖太祖命荆南成汭率荆襄舟師以赴

之未至夏口汭敗溺死淮人遂陷鄂州洪爲其所擒被

害于廣陵市時唐天復二年也

案九國志劉存傳存急焚鄂州城樓梁援兵將

突圍而出諸將欲急擊之存曰擊之賊必復入復入則其城愈固矣不若聽其遁去諸將皆曰善是日城陷擒

杜洪父子斬于廣陵市

天祐三年夏太祖表請爲洪立廟于其鎮

優詔可之太祖卽位詔贈太傅先是鍾傳卒于江西其

子繼之

案九國志秦裴傳天祐三年洪州鍾傳卒州人立其子匡時江州刺史延規傳之養子忿不得

立以其郡納款因授裴西南面行營招討使攻匡時城陷擒匡時以獻歐陽史采用九國志新唐書延規作匡

範與九國志異

尋爲楊行密所敗其地亦入于淮夷

永樂大典卷四百九

十一

五代史補鍾傳雖起于商販尤好學重士時江

西士流有名第者多因傳薦四遠騰然謂之曰英明諸

葛浩素有詞學嘗爲泗州營驛巡官仰傳之風因擇其

所行事赫赫可稱者數十條列于啟事以投之十啟凡

五千字皆文理典瞻傳覽之驚嘆謂賓佐曰此啟事每

一字可以千錢酬之遂以五千貫贈仍辟在幕下其激

勸如此上藍和尚失其名居于洪州上藍院精究術數大爲鍾傳所禮一旦疾篤往省之且曰老夫于和尚可謂無間矣和尚或不諱得無一言相付耶上藍強起索筆作偈以授其末云但看來年二三月柳條堪作打鐘槌偈終而卒傳得之不能測洎明年春淮帥引兵奄至洪州陷江南遂爲楊氏有打鐘之偈人始悟焉

田頴本楊府之大校也

案九國志頴字德臣廬州合肥人

朱延壽不知

何許人

案九國志延壽廬州舒城人與新唐書同

唐天祐初楊行密雄據淮

海時頴爲宣州節度使延壽爲壽州刺史頴以行密專

恣跋扈嘗移書諷之曰侯王守方以奉天子古之制也

其或踰越者譬如百川不朝于海雖狂奔猛注澶漫遐

廣終爲涸土不若恬然順流淼茫無窮也况東南之鎮

楊爲大塵賤刀布阜積金玉願公上恒賦頴將悉儲峙

具單車從行密怒曰今財賦之行必由于汴適足以資

于敵也不從時延壽方守壽春

案九國志天復初北司擁駕西幸昭宗聞延壽

有武幹遣李儼間道齎詔授延壽蔡州節度使

直頽之事密遣人告于頽曰公

有所欲爲者願爲公執鞭頽聞之頗會其志乃召進士

杜荀鶴具述其意復語曰昌本朝奉盟主在斯一舉矣

卽遣荀鶴具述密議白問道至大梁太祖大悅遽屯兵

于宿州以會其變不數月事微洩行密乃先以公牒徵

延壽

案新唐書行密妻延壽姊也遣辯士召延壽疑不肯赴姊遣婢報故延壽疾走揚州

次悉兵

攻宣城頽戎力寡薄棄壁走不能越境爲行密軍所得

案九國志行密別遣臺濛王茂章率步騎以往頽委舟師于汴建王壇自出廣德迎戰大爲濛所敗遂率殘衆

遁保宛陵壇建聞其敗因盡以舟師歸款于行密延壽
十二月顏出外州柵疾戰橋陷馬墜爲外軍所殺
飛騎赴命邇揚州一舍行密使人殺之案九國志行密
刺殺之新唐書從九國志當得其實薛史以爲邇揚州
一舍而見殺五代史補又以爲行密自奮鐵鎚殺之疑
皆屬傳其後延壽部曲有逸境至者具言其事又云延
壽之將行也其室王氏勉延壽曰今若得兵柄果成大
志是吉凶繫乎時非繫于吾家也然願日致一介以寧
所懷一日介不至王氏曰事可知矣乃部分家僕悉授
兵器遽闔中扉而捕騎已至不得入遂集家屬阜私帑
發百燎合州解焚之旣而稽首上告曰妾誓不以皎然
之軀爲讎者所辱乃投火而死

永樂

大典卷四千八百
五代史補揚行密

據淮南以妻弟朱氏衆謂之朱三郎者行密署爲泗州
防禦使泗州素屯軍朱氏驍勇到任恃衆自負行密雖
悔度力未能制但姑息之時議以爲行密事勢去矣居
無何行密得日疾雖瘳且詐稱失明其出入皆以人扶
策不爾則觸牆抵柱至于流血姬妾僕隸以爲實然往
往無禮首尾僅三年朱氏聞之信而少懈弛行密度其
計必中謂妻曰吾不幸臨老兩目如此男女卑幼苟不
諱則國家爲他所有今晝夜思忖不如召泗州三舅來
使營勾軍府事則吾雖死無恨妻以爲然遽發使述其
意而召之朱氏大喜倍道而去及入謁行密恐其覺坐
于中堂以家人禮見朱氏頗有德色方設拜行密奮袖
中鐵鎚以擊之正中其首然猶宛轉號叫久而方斃行
密內外不測卽時升堂廳召將吏等謂之曰吾所以兩
目失明者蓋爲朱三此賊今已擊殺兩目無事矣諸公
知之否于是軍府大駭其僕妾嘗所無禮者皆自殺初
行密之在民間也嘗爲合肥縣手力有過縣令將鞭之
行密懼且拜會有客自外入見行密每拜則廳之前簷
皆叩地而令不之覺客知其非常乃遽升廳揖令于他
處告以所見令驚遂恕之且勸事郡以自奮行密度本
郡不足依乃投高駢駢死秦彥孫儒等作亂行密連誅

之遂有淮南之地

趙匡凝

案新唐書匡凝作光儀

蔡州人也父德諲初事秦宗權爲

列校當宗權强暴時表爲襄州留後唐光啟四年夏六月德諲審宗權必敗乃舉漢南之地以歸唐朝仍遣使投分于太祖兼誓戮力同討宗權時太祖爲蔡州四面行營都統使乃表德諲爲副仍領襄州節度使蔡州平以功累加官爵封淮南王匡凝以父功爲唐州刺史兼七州馬步軍都校及德諲卒匡凝自爲襄州留後朝廷卽以旄鉞授之作鎮數年甚有威惠累官至檢校太尉兼中書令匡凝氣貌甚偉好自修飾每整衣冠必使人

持巨鑑前後照之對客之際烏巾上微覺有塵卽令侍
妓持紅拂以去之人有誤犯其家諱者往往遭其櫜楚
其方嚴也如是光化初匡凝以太祖有清口之敗密附
于淮夷太祖遣氏叔琮率師伐之未幾其泌州刺史趙
璠越墉來降隨州刺史趙匡璘臨陣就擒俄而康懷英
攻下鄧州匡凝懼遣使乞盟太祖許之自是附庸于太
祖及成汭敗于鄂州匡凝表其弟匡明爲荆南留後時
唐室微弱諸道常賦多不上供唯匡凝昆仲雖強據江
上然盡忠帝室貢賦不絕太祖將期受禪以匡凝兄弟
並據藩鎮乃遣使先諭旨焉匡凝對使者流涕答以受

國恩深豈敢隨時妄有他志使者復命太祖大怒天祐
二年秋七月遣楊師厚率師討之八月太祖親領大軍
南征仍請削匡凝在身官爵及師厚濟江匡凝以兵數
萬逆戰大爲師厚所敗匡凝乃燔其舟單舸急棹泆漢
而遁於金陵後卒于淮南案新唐書云師厚繇陰谷伐
木爲梁匡凝以兵二萬瀕江
戰大敗乃燔舟單舸夜奔揚州行密見之曰君在鎮輕
車重馬輪于賊今敗乃歸我邪匡明亦謀奔淮南子
承規諫曰昔諸葛兄弟分仕二國若適揚州是自取疑
也匡明喟然乃趨成都歐陽史云行密厚遇匡凝其後
行密死楊渥稍不禮之渥方宴食青梅匡凝顧渥曰勿
多食發小兒熱諸將以爲慢渥遷匡凝海陵後爲徐溫
所殺初匡凝好聚書及敗楊師厚獲數千卷于第悉以來
獻匡凝弟匡明字贊堯幼以父貴一子出身爲江陵府

文學及壯以軍功歷繡峽二州刺史成汭之敗其兄匡
凝表爲荆南留後未至鎮而朗陵之兵先據其城矣匡
明領兵逐之遂鎮于渚宮天祐二年秋太祖旣平襄州
遣楊師厚乘勝以趨荆門匡明懼乃舉族上峽奔蜀王
建待以賓禮及建稱帝用爲大理卿工部尙書久之卒

于蜀

永樂大典卷一萬
六千九百九十一

張佖不知何郡人也

案九國志佖京兆長安人乾寧初
以明經中第累遷宣州從事復爲

秦宗權行軍司馬後與劉
建峯據湖南推建峯爲帥唐乾寧初劉建峯據湖南獨

邵州不賓命都將馬殷討之期歲未尅而建峯爲部下
所殺軍亂鄰寇且至是時佖爲行軍司馬屬潭人謀帥

日張行軍卽所奉也佶不得已而視事旬日之間威聲

大振寇亦解去

案九國志建峯將吏推佶爲帥佶將入府常所乘馬忽爾蹊齧不止正中佶髀

佶謂將吏曰吾非汝主當迎馬公爲之乃謂將吏曰佶

與薛史異新唐書劉建峯傳從九國志

才能不如馬公况朝廷重藩非其人不可因以牘召殷

亦不疑稟命而至佶受拜謁禮畢命升階讓殷爲帥佶

卽趨下率衆怵賀乃自請率師代殷攻邵州下之復爲

行軍司馬垂二十年殷果立大勳甚德佶開平初殷表

佶爲朗州永順軍節度使累加檢校太傅同平章事乾

化元年夏四月卒于位

案九國志乾化初移鎮桂林卒于治所詔贈侍中

永樂大典卷六

千三百五十

雷滿

案新唐書
滿字秉仁

武陵洞蠻也始爲朗州小校唐廣明初

王仙芝焚劫江陵是時朝廷以高駢爲節度使駢擢滿

爲裨將以領蠻軍駢移鎮淮南復隸部曲以悍獷趨健

知名中和初擅率部兵自廣陵逃歸于朗汭江恣殘暴

始爲荆人大患矣率一歲中三四移兵入其郛焚蕩驅

掠而去唐朝姑務息兵卽以澧朗節度使授之

案歐陽
史云滿

殺刺史崔翥遂據朗州請命于唐昭宗以澧朗爲武貞
軍拜滿爲節度使新唐書則云詔授朗州兵馬留後進

武貞軍節度使與
薛史微有互異

累官至檢校太傅

案新唐書作
檢校太尉

同平

章事滿貪穢慘毒蓋非人類又嘗于府署濬一深潭構

大亭于其上每鄰道使車經由必召讌于中且言此水

府也中有蛟龍奇怪萬態唯余能游焉或酒酣對客卽
取筵中寶器亂擲于潭中因自褫其衣裸露其文身遽
躍入水底徧取所擲寶器戲弄于水面久之方出復整
衣就座其詭誕如此及死子彥恭繼之案新唐書滿以天復元年卒子
彥威自立弟彥恭結忠義蠻蜚狡獪深有父風燼墟落
榜舟楫上下于南郡武昌之間殆無人矣又與淮蜀結
連阻絕王命太祖詔湖南節度使馬殷荆南節度使高
季昌練精兵五千遣將倪可福統之下澧州與潭兵合
先是滿塹沅江以周其壘門臨長橋勢不可入殷極其
兵力攻圍周歲彥恭食盡兵敗間使求救于淮夷及淮

軍來援高季昌逆戰于治津馬頭岸大破之俄而攻陷

朗州彥恭單棹遁去

案通鑑考異引梁太祖寔錄云彥恭沒溺于江通鑑從紀年錄作奔

廣陵歐陽史與通鑑同

馬殷擒其弟彥雄及逆黨七人械送至闕

皆斬于汴橋下時開平二年十一月也

永樂大典卷二千七百三十一

史臣曰成汭鍾杜田朱之流皆因否運雄據大藩雖無濟代之勞且有勤王之節功雖不就志亦可嘉若較其誠明則田頔延壽斯爲優矣匡凝一門昆仲千里江山失守藩垣未克負荷斯乃劉景升之子之徒歟張佶有讓帥之賢雷滿辱俾侯之寄優劣可知矣

永樂大典卷二千七百三

舊五代史卷十七終

舊五代史卷十七攷證

梁列傳七成汭傳唐宰相徐彥若 彥若原本作產若

今據新唐書改正

舊五代史卷十七攷證